

## **ASO FARAILE, 8 MATI 2024**

*Na nofoia e le Fofoga Fetalai le Nofoa i le itula e 9:38 i le taeao.*

Tatalo.

**FOFOGA FETALAI:** Ou te faasilasila atu ua amatalia nei Taualumaga a le Fono Aoao Faitulafono.

O le a tapaau pea ia i le la'i i le fasa nai faga e pei o le gagana i le faatali a Vaoto ma le taisi nai le uli o Amoa. Ua gafoa foi le ata o taeao manino ma ua nanati paesina le si'ugalu o le soogataiula ina ua sola le nuu tutai ae laga mauga talimalama.

Taoto ia le paia o le alofā o le Maota Fono e tasi o Samoa, vaeatu upu e tausi e tula o le Malae o le Faautugatagi a le atunu, o mamalu e le avea o sa foi e le vaea. Ua tala mai le lagi le mamalu o le Atua ina ua maleifua mai i le lagi e mama ma le soifua manuia le paia o le Palestene.

I le afio o lau Afioga i le Taitai o le Malo lau Afioga i le Tamaitai Palestene, afio lau Afioga i le Sui Palestene, afifio a outou Afioga i Minisita o le Kapaneta, afifio foi Afioga i Minisita Lagolago.

Le paia i lea tala na atoa i le afio o lau Afioga i le Taitai o le Itu Agai, afio lau Afioga i le Sui Taitai ma le afifio o sui usufono uma o le Palestene. I le tulaga aloaia, tau ia o se gagana e faatulima ma faafeiloai atu ai i le paia o le Palestene. Malo le soifua manuia ma le lagi e mama. Ua tatou i ai i le toe aso o galuega o lenei vaiaso, ua faamalo le faatoatoa, faamalo le onosai, faafetai le faapalepale. E maualuga foi le taofi o lo o agalelei pea le Atua i si o tatou atunu i ona tafa e fia, i le afua mai mauga maualuluga ma tolotolo faitauina seia paia nai a tatou fanau iti. O paia faale-Talalelei, o paia faale-Malo ma mamalu faaleaganuu, e faatalofa atu lau Palestene i lenei taeao.

I le saofaiga a Ofisa Sili o Pulega a Matagaluega ma Faalapotopotoga Tumaoti a le tatou Malo, e faatalofa atu, taeao manuia i lo outou lagi e mama. Le alofaiva o le tatou Maota i lenei aso, o le tatalo lava a le Fofoga Fetalai, ia alofagia e le Atua le sailiga mafua, agalelei le Alii i usugafono uma, ia manuia foi le tapuai mai a si o tatou atunu.

Mo le silafia e le Palestene, o lena ua tufatufa atu i luga o a outou laulau nai meaalofa mo a outou afioga. Faafetai i le Alii i Lana foai.

**TULAFONO TAU FAAOFI O TEUTEUGA O LE TULAFONO O  
FAIGA PALOTA 2024 – faitauga faalua – felafolafoaiga faaauau – aso  
fono lona fa**

**FOFOGA FETALAI:** E tolopo Taualumaga a le Fono Aoao i le aso Fono ananafi ua maea saunoa uma sui usufono mamalu o le Palemene.

Ia, a o le avanoa lenei mo le Taitai o le Itu Agai e saunoa ai i le tatou Tulafono Tau Faaofi. Lau Afioga i le Taitai o le Itu Agai.

**Afioga Fuiono Tenina Crichton (Falealupo):** Lau Afioga i le Fofoga Fetalai, e leai, e faamalulu atu, ua oo i le taimi o le Afioga i le Taitai o le Itu Agai, ae talu ai o lenei sui usufono, ua ala ona le oo mai ananafi o le lē atoatoa o le malosi, ae faanoi atu pe mafai sina avanoa o Fuiono aua foi lenei itumalo ona tuu loa lea i le Taitai o le Itu Agai aua lenei aso. E le faia se finagalo po o se loto, o le mea e finagalo i ai lau Afioga.

**FOFOGA FETALAI:** Ia, ua maea ona fai le faaiuga a le Nofoa i le aso ananafi. E i ai foi le manatu e le mafai foi ona tatou toe o i tua. O le fuafuaga na i ai le fono ananafi, ua maea uma sui usufono mamalu ma ua uma foi ona fai atu le faaiuga a le Nofoa.

**Afioga Fuiono Tenina Crichton:** Ia ua le afaina lea, o le a seu le sa o Fuiono leaga o le mea ua uma ona faataoto.

**FOFOGAFETALAI:** Faafetai. Faafetai foi le lagolago mai i le Nofoa.

**Afioga Fuiono Tenina Crichton:** Ia lelei, o le faiva lava o faaaloalo e taua lena.

**FOFOGA FETALAI:** Faafetai. Ia, lau Afioga i le Taitai o le Itu Agai.

**Susuga Hon TUILAEPA FATIALOFA AUELUA SAILELE MALIELEGAOI (Taitai o le Itu Agai):** Ou te tulai atu ma le ava tele e momoli atu le faamalo i lau Afoga i le Fofoga Fetalai i le taitaiina o le tatou Fono. E le faigofie le matou taumafai atu ma finau atu pea mo ni avanoa, ae le faigofie i lau faaoasoa mai. Ma i le tatou Maota nei ua masani lava lau Afioga i le isi foi Paeaiga sa tatou mafuta ai, o le gagana lava lea a le Palemene lenei, e le milia faau'u upu o le tatou Maota lenei, ae a maea lava, ona toe foi lava lea i tatou tu ma aga masani o le faaaloalo ma le fealofani.

E ala ona ou faatauaina le mea lenei, i lenei Paeaiga i Paeaiga ua tuanai, sa lagalaga ai foi finagalo. E i ai le taimi na tulai atu ai foi le Taitai o le Itu Agai o le a alu atu o le a faaoo ona lima i le Fofoga Fetalai, toe taofi mai lava i lalo mai o le laulau a o lea matou te vaavaai i ai. E le o iloa e le Taitai o le Itu Agai, o la e uu e le Fofoga Fetalai le samala. Pe ana fai se gaoioiga, o lona uiga o le aso faamasino lena o le samala a le Fofoga Fetalai. E aoga foi mo tatou, i te i ua galo e i ai le samala a le Fofoga Fetalai. Ae faamalo tele atu i lou onosai.

Ou te momoli atu foi le faafetai ma le faamalo i le Afioga i le Palemia ma lana Kabeneta, faamalo le galulue, faamalo foi i le tatou Maota nei i a outou Afioga i sui usufono o lena itu faapea foi sui toaitiiti o lenei foi itu, ae a le tapuai mai a Ofisa Sili o Pulega o Matagaluega o lo o tautuaina le Malo ma le Maota ma tatou uma lava ma le atunu.

E le mafai foi ona le oo se upu i le tapuaiga leleoa a Le Ao o le Malo faapea foi ma le Sui Tofia. O lea foi ua maea ona paepaeulufanua e lau Afioga i le Fofoga Fetalai. Faamalo i le tapuaiga a Samoa i ona tulaga faalupelupe.

E tatau foi ona oo se upu faamalo i o tatou uso a Malo i Amerika Samoa. E le mafai lava ona aveesea le mea lenei. E maualuga le soifuaga faatamaoaiga o Amerika Samoa ona o faigapaaga ma se atunu pito maoae le mauoloa i le lalolagi lenei, ma o lea lava tatou te molimauina. O le a le tafe mai o le suasusu ma le meli i Amerika Samoa, e au mai lava i inei i le tatou atunu le faasoa. O le tatou tatalo, ia faaaau peia ia faigamalo lelei i le va o Tutuila ma le Malo tele o Amerika, aemaise foi o le tatou talotalo ia mafai ona ulufale atu i le saofaiga a Malo o le Pasefika. Toeitiiti ava sao i le isi foi fonotaga a o ou taitaia le Malo, peitai, toe tasi lava le mataupu na le mafai ai, o se ioega a le Malo tele o Amerika. I lau la maitau i le taimi lenei ma lau faalogologo atu o le a faatu ni Ofisa o Amerika i Niue faapea foi ma le Atu Kuki. Ou te manatu foi ua faigofie le ulufale atu o Amerika Samoa i le saofaiga a le Pasefika ona lua ai lea o tatou leo lau Afioga ma tele ai le tatou sao i le faatulagaina o tonufai o Malo uma o le Pasefika ae tau ai lava o tatou o Samoa.

Ia, ae matua lava le tuu i le faamalo i le aufaitatalo ma le latou faanonogamanu aua o tatou faiva.

Lau Afioga i le Fofoga Fetalai, e tatau lava ona oo sina au upu ou te faafetaia ai le faatofalaiga i le faifaipea o tatou feiloaiga ia amata, feiloaiga faasamasamanoa e faatalatalanoa muamua ai Tulafono ona aumai aloaia ai lea i le Maota nei. O le itu taua o feiloaiga nei e faafraigofie ai ona malamalamama ni mataupu a o lea e tutulai mai ai ma latou o Ofisa Sili o Pulega o Matagaluega ia ma loia foi e fesoasoani ia i tatou uma e faamatala lea Tulafono ma lea Tulafono. E tatou te fono mulimuli atu la i inei a o lea ua malamalamama le Tulafono ma ua faigofie ai foi i saunoaga a le Maota ma faigofie foi i le faafogafoga mai a Samoa. Ma o se faiga lea e tatau lava ona faataua ma faaaau. E taua foi ia i tatou le valaau atu o le Fofoga Fetalai ma tatou auai uma i le faatalanoaga o Tulafono nei. O i la i le faatalanoaga na tatou malamalamama uma ai lava i le agaga o le Tulafono, o se agaga lelei le tatau ona faasa'o. O le faapuupuuga lava lena, faasa'o tatou lola palotai totonu o tatou itumalo. Aisea? A lea na saunoa manino le sui usufono tamaitai mai Aleipata, e taua tele le manino ma le sa'o leaga o i lea e faavae ai lau Afioga ona galueaiina le pasene 10% e 10%. A le sao le lola ua sese foi le tofiga o le sui faaopoopo o tina pe a moomia ia le Tulafono lea ona o lea e manino i Tulafono o lo o i ai nei, e silia loa ma le 10% ona faataatiaese loa lea o le Tulafono lea ina ia faamautu ai, ia le i lalo ifo o le 10% sui tina e mafai ona omai i totonu o le Maota lenei. O le taimi e aveese ai le 10% lena e le mafai ona toe maua se mautinoa pe toe sao mai ni tina i totonu o le Palemene lenei. Aisea? Leaga e tutusa lava Samoa ma atunu uma o le lalolagi e ave lava le faamuamua i tamaloloa, tama tane ona o

le talitonuga lava lea e tasi ai le lalolagi atoa e le tatau ona omai ni tina i mea nei, o le latou lava galuega o le vaai o fanau. A o le uiga lea o lea ua agai i ai le lalolagi, lea foi la na tatou faataoto ai le 10% lea ma o lea e faataua ai le sao atoatoa o le tatou Lola Palota.

Ia, e faapei lava ona avatu foi le anoano o fesili i lenei itu faapena foi i lena itu, e le o se mea leaga aua e fou uma lava ia i tatou i lenei itu ma lena itu. Na o le Kapaneta e malamalamala i le Tulafono, lea foi la na faamalamalamala mai, ae o le fofo mo tatou uma i lena taeao o le saunoaga a le Palemia. O mataupu uma ia ua outou laga, e taua, a o le a taatia mai i le Kapaneta e toe vaavaai i ai. O i ina ua uma ai le mataupu.

O lenei Vaega, na matua lafo atu le lagolago e faapena foi i ina, lagolago uma lava le Tulafono lenei ona e tele le aoga ma le sa'o o le mafaufauga lea e faavae ai o le faasao o le tatou Lola Palota. E le o se mea leaga, lea foi na toe tele ai upu aua o le mea moni lava toeitiiti a malepe le fale i le maualuga o leo e le gata o i ina a o i nei foi. A o uiga lava ia e le o ni uiga leaga, o uiga e faaali ai le malosi o se talitonuga ae na maua le fofo ia i tatou uma, taatia o le a lafo atu i le Palemia ma lana Kapaneta e toe tilotilo i ai. O i ina lea e faavae ai le lagolago a le itu lenei, e le se'e ese mai lava ma tatou talanoaga sa fai.

A o le a foi la le faafogafoga mai i manatu, a o lea ua taoto. E tasi lava le sui usufono lea o le a ou tau atua, na o le tasi lava le sui usufono 100% lona lagolago, togi atoa le moa ma le afa. E le i faia se mea foi lea na o le togi o le moa ae taofi le afa. Na o le tasi lava le sui usufono na faia le mea lena e leai ni ona atugaluga, leai sona faapopolega. O ai? O le Afioga lea ia Loau. A o lea foi la na tatou faalogologo i le mafuaaga, o le mafuaaga e pei o lona aualofa mai lea ia i tatou. O sana toe upu aualofa i le tatou Palemene ma tatou nei o faipule pea. Ae talofa e! Ona o ia o lea o le a tuli e le Fofoga Fetalai. E pei la o le mea lena, e leai lava ma se isi lava mea.

**FOFOGA FETALAI:** Ou te fesoasoani atu i lau Afioga i le Taitai o le Itu Agai...

**Susuga Hon TUILAEPA FATIALOFA AUELUA SAILELE MALIELEGAOI:** A aumai leaga o ia lea o le a tuli e le Fofoga Fetalai a o lea foi la ua tatou faafogafoga i le Fofoga Fetalai, aua le popole ina mea, Ioe, tuu i le Atua. Ou te lagolagoina foi la le Fofoga Fetalai i le tulaga lena, a tatou faalogologo nei i le Fofoga Fetalai o tatalo se pei ua ou faaloga i le Atua lea. O le mea la lea tatou uma i totonu o le Maota lenei, tatou mulimuli i le mea lea e saunoa mai ai le Fofoga Fetalai. Ia ma se i e tau onosai o lea toeitiiti lava e faalavelave mai foi.

**FOFOGA FETALAI:** Ia malie lau Afioga i le Taitai o le Itu Agai, se i fai atu pea se tala a le Nofoa leaga o lea ua taua le tulaga lea. E alofa foi i le sui usufono mamalu, aemaise foi o le tatou aputiputi i a tatou Tulafono Tumau ona o mataupu ua i le faamasinoga, pei o le itu lena. Ina ne i avea ma avega mamafa i le sui usufono mamalu aemaise foi o le faafogafoga mai a si ona itumalo, a o la ua silafia e le sui usufono mamalu tulaga uma. Ia aemaise o le tatou tuu i le

Atua mea uma, ae i ai le manatu lau Afioga i le Taitai o le Itu Agai, aveese ia lou finagalo, ua ta'ua le suafa o le sui usufono mamalu.

**Afioga Hon Loau Solamalemalo Keneti Sio (Sagaga 1):** E maua se avanoa lau Afioga i le Fofoga Fetalai.

**FOFOGA FETALAI:** Se i tulai mai lau Afioga leaga o lea ua taua lou suafa.

**Afioga Hon Loau Solamalemalo Keneti Sio:** Faafetai foi ua aoga foi le ta'ua o lou igoa ua maua ai foi le avanoa e toe faatalofa atu ai foi i lau Afioga i le Fofoga Fetalai. Ia aemaise foi o le paia o le Maota nei i ona tulaga faalupe. Masalo o lena e manino lelei foi i le taimi na fai ai le faamatalaga i le Aso Gafua i le tatou Pre-sitting. Ina ia manino, o le agaga autu i lou mafaufau a faapea ua faaletonu le tatou system o lo o i ai o le mea e tatau ona fai o le sui. Ioe, e tatau ona faalelei ma faaatoatoa. Ia o se tala foi na faapena ona ou fai atu i lau Afioga e tusa foi o lea aso, ia o suaga lava o le vaatele. Ae o le tulaga i le ta va nonofo ai ia leai o lo o faapena lava ona to'a le tai aua le ta va nonofo ai ma le tulaga foi e pei ona i ai le ta mataupu.

Ae taatia maia le maua mataupu ma le Fofoga Fetalai aua le atugalu fua i ai le mamalu o le Palestene. Ioe, ia ma le agaga faaaloalo.

**FOFOGA FETALAI:** Malo saunoa i lau Afioga.

**Susuga Hon TUILAEPA FATIALOFA AUELUA SAILELE MALIELEGAOI:** Lau Afioga...

**FOFOGA FETALAI:** Ia, o lea ua faafofoga mai lau Afioga i le Taitai o le Itu Agai o lo o toamalie lava le Afioga i le sui usufono mamalu.

**Susuga Hon TUILAEPA FATIALOFA AUELUA SAILELE MALIELEGAOI:** O le ala foi lena lea ou te faaopoopo atu ai, onosai. A e onosai e te oo i le parataiso, o le parataiso sa i le lalolagi lenei a o la ua i luga i le lagi. Ou te tatalo la e te alu i le parataiso la e i le lagi.

Lau Afioga i le Fofoga Fetalai, e i ai lava le mataupu lenei e amata atu ai se manatu. Na matuai ou fafia ananafi i le tulai mai o le Epikopo ma aumai sana tala faale-Tusi Paia i le Faataoto, e ese le taua ia te au aemaise upu ia leaga e fitoitonu lava i le tatou mataupu o lo o tatou talanoa ai. O Afioga a le Alii, lea e faapea ai e le aoga ona utu le uaina fou i se fagupau tuai, e pa ona maimau ai lea o le uaina. Ona toe faapea lea o le tatou Alii, e faapei foi ona le tatau ona fono se matuaofu i se ie fou e masae.

O le fetalaiga lea a le tatou Alii na fesiligia ai e so'o e toatolu o Ioane, a o lauga le tatou Alii i Tiperia e tumu ma toatele ai tagata Roma, tagata mauoa. O le uiga la o le fesili pei e faavae i luga o le ita, i le vaai o le Alii e sau lauga i tagata mauoloa, lea la e faavae ai le fesili lea ae agai i le anapogi.

O le fesili a latou nei; "O le a alii Iesu le mea e le anapogi ai ou So'o a o matou na o le matou anapogi, anapogi, anapogi." O le fesili e pu'e ai Iesu. A o le fesili

mai i So'o e toatolu o Ioane. Ia ona tali loa lea o Iesu i le mataupu lea, o le fagupa'u ma le uaina fou. Ona talanoa lea o Iesu e faamatala, afai o oe o le faatoafaiava e tatau i au uo ona aua ne i anapogi se isi seia oo i le taimi ua aveese ai le faatoafaiava ona faatoa anapogi lea. O lea e talanoa Iesu ia te ia lava. Ona faapea loa lea o Iesu, i le taimi lenei o lea e malosi talaiga ma uiga e fai o le anapogi. Ae toeititi ane ona alu atu loa lea o lau talaiga e faavae i le alofa ona tanumia ai loa lea o le talaiga tuai lena.

Ia, ma o le taimi lenei, faaauau pea mo sina vaitaimi seia oo i le taimi e sau ai la'u talaiga. O le taua ia, masalo o totonu i i lea e taoto ai ni manatu e taua mo le Tulafono lenei.

O le fesili lau Afioga i le Fofoga Fetalai; o le mataupu tonu lea sa tele ai manatu o le tulaga foi lea e faafaigofie, o le resitala mai ma palota mai o tatou tagata mai fafo. E pei o le itu tele lava lena, a o lea foi e i ai isi manatu e mafai ona faaaaoga le faiga fou, le faiga fou lea. Ae faafaigofie le tulaga, aumai nisi o faamatalaga o lo o i totonu o le faiga tuai e tuu i totonu o le faiga fou lea ma faasaoina ai le taimi o le toe tala'u mai o tagata e palota. O a la uiga ia? E tai pei o le faataitaiga, o asofanau, e le toe suia ni asofanau. Ae o le toe tapa o asofanau o le matua tele lava o le gasu e toe o foi tagata toe faatau mai, alu ai lea o le tupe e toe faatau mai ai le pepafanau fou aua o le amio a lea e uma loa se mea na fai tiai le pepafanau.

O le manatu, e tatau ona oo sina au upu agai i tua ona o le tele o Tulafono e teuteu ai le Lola lea e oo mai nei lava o lea lava e teuteu le Lola. E le o se mea tatou te ofo ai, afai o lea e faaaaoga le Tekonolosi ae ua faaaaoga e Rusia e pulea ai le faaiuga o Faiga Palota a Amerika, e faigofie tele lava ona faaaaoga le tekonolosi e faatonu mai ai e nisi e masalomia lo latou auai po o le aiatatau e tatau ona palota ai i totonu o se nuu. A o lea ua lafo atu ia i latou e tilotilo i uiga ia leaga ua tupu.

O lea ou te manatua i le taimi faatoa ou ulufale mai ai afai, ua sefulu tatou Paeaiga mai le 1982 e tau mai i le taimi lenei, a o lenei lava e talanoa i le faafitauli o le Lola, o le a le mea lea e tau mai i i? E le mafai lava ona aluese faiga faa-solitulafono e tupu i so o se Paeaiga. O le ala lena na matou feiloi ai i lo'u faatoa sau i totonu i le Vaega Faauupufai lenei ona matou talanoa lea i se faiga e taofia ai le mea lea o le faaaogasese o le Lola e palota ai isi i igoa o latou ia ua feoti pe ua o i fafo. Talanoa, talanoa, talanoa, nai toeaiina o Tofilau, Vaai, Nonumalo Sofara, o Polataivao Fosi, o Lavea Schmidt. Matou talanoa ai, le Afioga ia Le Mamea lea e avea nei ma Sui Tofia. O le a se faiga e fofo ai lenei mea seia tau i le faavavau o le omai fua palota i igoa o isi? Ona matou taunu ai loa lea i le faiga lea o le fai o ata o IDs. Matou pepese o le mea lea o le a uma ai faafitauli.

A o le a le mea lea na tupu? Ua... i le taumafai o le sui faatu e faumalo, ia ua o loa talau mai tagata aumai e ave e fai IDs. Ia, toe alu atu le isi sui, ua fai lau ID? Leai. Ao la ua uma ona fai. Īa sau ta o, mogomogo i ai le tupe. O le auala lea e faaauau i ai le faatosina a sui faatutu. Lea la ua tatou pepese ai i le taimi nei. Ua mumusu tagata e o. E le o le mumusu e o e palota a o la e manao e alu atu le sui usufono e aumai ia ma mogomogo atu sana tupe ia te ia. O ai e mafua

ai? O sui faatutu. O le taua o le mataupu lenei i le ID leaga na pau ai le uluai taitai o le Vaega lenei. O le mea lena e...

**FOFOGA FETALAI:** Toe lua minute o le sui...

**Susuga Hon TUILAEPA FATIALOFA AUELUA SAILELE MALIELEGAOI:** Mea lea e taua tele ia te au le vaega lea. Na pau ai le uluai taitai o le Vaega lenei. Lea la ua toe teuteu le Tulafono ma toe teuteu atili. E tatou te fiu e teuteu e i ai lava togafiti e fai. Ae afua atu i fea, e afua atu i totonu o tatou. Mai le 1962 na faataga ai o tatou tagata e omai e palota i Samoa nei. O lea la e oo mai nei o la e le i aveesea lena mea. E mafai ona e sau e te palota, ae e te lele mai, e te lele mai o tau i inei. O le a la le mea lea ua tupu? Lea ua sau le faamatalaga i le tasi o Minisita e leai se isi e palota mai fafo, e felelei mai lava i inei e fai le latou palota. Manaia tele le manatu lea ou te lagolagoina ai le itu lena ma aveese ai le faapopolega lea e i ai lea sa faataga e o tatou tuaa. Aisea? O tatou tagata lava ua o i fafo aua tatou te toe faalavelave i ai, a o tagata e nonofo i le atunu, fai e latou le atunu. O le mafuaaga lena na fai ai e tatou tuaa mai lava i le 1962, faataga. A o lea la na fai le suiga faapitoa e mafai ai ona faapalota mai o tatou sui ia e o e faigaluega e tauapu ma tatou tagata ia e faigaluega i totonu o tatou Hai Komisi. O tagata a inei, o tagata a inei, e leai se mea fou na tatala. Ua ou avatua le itu lea ona e i ai ni manatu na faaalia e faavalevalea le iuga na fai. E le faavalevalea toeiaina i le 1962 na latou faataoto maia le faiga lea, lea tatou te o ai o lava e tau mai le taimi lenei, a o lea la o le a tatou suia ae ou te fiafia i lou faalogologo atu, e leai e omai lava i latou i Samoa nei e fai latou fingerprints. O lona uiga la, o lea ou te nofononofo nei ma tuuufesili, o le a ea la le mea na fai ai a o lea lava e omai?

Ia, o le isi tulaga maoae o totonu o le Maota lenei talu lava ona ou sau e fesiligia ai pea e sui usufono, aisea e lua ai sui o isi itumalo ae tai tasi isi?" E tatau foi ona tailua matou. O isi sui usufono ua lauga mai o le a ea le mea, o lea e uma ane le palota i Savaii e 200, 300 palota e sili ai le sui, fai le pati i le po ae oo i le taeao alu atu le faasalalauga i i, ua sili le na faiaina i le le isi foi 400 palota. O le a la le mea ua tupu? O le leo ua aumai i le Malo, sa alu atu lava foi i totonu o le Maota lenei e sili ia ona alu le tagata ia e palota i lona nuu. O lea foi la na faatino ai lena mea, faatino ai le tulaga o le toe fetuunai ia tasi le tagata tasi le palota. O le agaga lelei. Ae afua atu i fautuaga i totonu o le Palemene lenei, ia ua ou fiafia, matua ou fiafia ina ua toe teuteu e outou le Tulafono lea e toe fai fale palota i inei ona o lea na matua atagia i le faiga palota talu ai, e le lelei foi lea faiga. Ma pe ana tou le teuteua, ou te lagona a matou toe foi atu ina i se isi afe tausaga o i le lumanai matou te o atu lava toe faasao mea ia.

E i ai le tulaga e tatou te faia ai mea uma i le talitonuga lelei. E pei foi la o le vaevaega o itumalo, ana le faia le mea lena e le sao mai Tuala i totonu o le Palemene. E tele mea lelei sa fai, a o le agaga sao sa fai ai. E le o se agaga piopio po o le fia malo o le Vaega lenei o le agaga ina ia sao a tatou faaiuga e faapei ona lauga ai outou o sui usufono. O lea la ua tatou faalogo nei...

**FOFOGA FETALAI:** Talu ai lau Afioga i le Taitai o le Itu Agai. Ia, e leai, e le mafai foi ona tuua le tiute o le Nofoa. Ae taua foi avanoa faapenei, ae manatu ona o lo o i ai o tatou taimi faatapulaaina ae o lo o foi le avanoa e faatu ai se lafo e faaauau lau saunoaga. E faapena auala Faapalemene e ao lava ona tatou uia. Ia, se i tulai mai lau Afioga Tuala.

**Susuga Hon TUILAEPA FATIALOFA AUELUA SAILELE MALIELEGAOI:** Leai, lau Afioga i le Fofoga Fatalai ou te le manao e faatu se lafo lea o le a faauma.

**FOFOGA FETALAI:** Ia, faafetai.

**Susuga Hon TUILAEPA FATIALOFA AUELUA SAILELE MALIELEGAOI:** Ae taatia ia...

**Afioga Hon Tuala Tevaga Iosefo Ponifasio (Sui Palemia, Minisita o Tupe Maua):** E maitau atu lau Afioga i le Fofoga Fatalai...

**FOFOGA FETALAI:** Ia malie lau Afioga i le Taitai o le Itu Agai se i tuu atu le avanoa i le Afioga ia Tuala.

**Afioga Hon Tuala Tevaga Iosefo Ponifasio:** O lea o le a tau faaifo le saunoaga matagofie a le Susuga ia Tuilaepa. Manaia lava lana saunoaga ma le faasologa mai o tulaga foi o le Tulafono sa i ai ae ua toe afesese lava ma taua lou igoa ona e faapea ai o sana taumafaiga lea i le Tulafono o le palota talu ai lea na ou tulai mai ai. Ou te manumanu lava i le tulaga lea ua e saunoa ai lau Afioga, ona a ou talanoa atu loa i le tulaga faaletonu na i ai lau Tulafono, oi, ia e le fia faafogofa i ai Samoa. Pau lava le mea ou te toe fia faamanatu atua lau Afioga na oo lava ia Setema o le a tapunia le lola ia Oketopa o tasui lava lau Tulafono. Ou te le auai la i le mea lea e te saunoa mai ai, o lau Tulafono lea na ou sao mai ai. Na ou sao mai lava au ia i lou taumafai e kami solo i talaane o lau Tulafono faaletonu sa i ai. Ia ma le faaaloalo lava.

**FOFOGA FETALAI:** Ia...

**Susuga Hon TUILAEPA FATIALOFA AUELUA SAILELE MALIELEGAOI:** E leai lava se sese o le mea lea na ou fai atu ai, e sao uma lava mea ia na ou fai atu ai. E pau lava le mea lea e taua i le faigamalo lenei o le tapa o finagalo o le atunu, lea na ala ai na o i tua ma aumai so latou finagalo. Lea foi na tapa e outou finagalo o le atunu i le palota mai o tagata mai fafo. Ia lea na tautino mai e le lagolagoina e le toatele o le atunu. A o lea foi la ua faafogafoga mai i le tatou felafolafoaiga. Lau Afioga i le Fofoga Fatalai ou te le manao e faavevesi le Maota lenei.

**FOFOGA FETALAI:** Faafetai. Malo faafetai.

**Susuga Hon TUILAEPA FATIALOFA AUELUA SAILELE MALIELEGAOI:** Pau lava le mea ia faamatala mea ia o mea uma na fai e le HRPP mo le manuia lautele o le atunu. Ae sa ou faalogo lava i iuleo, e fai uma HRPP mea ia ina ia malo mai ai pea latou... E faalua ona see ese le Vaega lenei, e faalua. Ae le i faia se Tulafono ina ia manuia ai le HRPP na fai mo le atunu lautele. Manuia le fono.

**FOFOGA FETALAI:** Malo faafetai. Ia, malo malele. Faafetai foi saunoa i lau Afioga i le Taitai o le Itu Agai. E taua foi fautuaga pei ona tuuina mai i le tatou Maota aemaise foi o le poupouina atili o le tatou Tulafono Tau Faaofi. Ia, malo lava saunoa faafetai mo saunoaga. Atonu o lea foi ua faafofoga le paia o le Maota aemaise foi le Afioga i le Minisita ma le tatou Ofisa o Faiga Palota i lou foi sao ia... faatoe tagata matua o le tatou Maota. Ia malo faafetai saunoa.

Ia, o lea ua maitau atu ua maea sui usufono sa sausaunoa. Lea foi ua uma ona tuu atu le avanoa i le Taitai o le Itu Agai. Ia malo lava faafetai ae tapa ma le faaaloalo lau Afioga i le Minisita o le Komisi o Faiga Palota e tulai mai e saunoa i mataupu na laga e sui usufono mamalu e faataau i le Tulafono Tau Faaofi.

**Afioga Hon FAUALO HARRY SCHUSTER (Minisita mo le Ofisa o le Komisi o Faiga Palota):** Faafetai tele i lau Afioga i le Fofoga Fetalai mo le avanoa. Ae le i see atu le faamatalaga i le taliina o fesili na tuuina mai, e momoli atu lau faafetai tele i sui uma na saunoa i le Tulafono Tau Faaofi i le suiga lea o le tatou Tulafono e faatutusa uma ai tatou tagata e agavaa e resitala mo le faiga palota i le tulaga lea e mafai ona talosaga mai po o la e i Niu Sila po o nofo i inei i Samoa ae talosaga mai e resitala ia ae faatino i ala faatekonolosi. Ona faapea foi lea ona i ai le Tulafono e mafai ai ona faasee mai le faamaumauga faatekonolosi i totonu o le system fou lea e i ai ona e le o toe mafai ona gafatia e le system tuai o lo o i ai.

Faafetai tele lava i sui usufono na saunoa uma. Faafetai mo le lagolago i le Tulafono. Faafetai mo manatu na faaalia. Na faaalia foi atugaluga ma popolega i le Tulafono. E talafeagai le i ai o tatou atugaluga ma tatou popolega. E faavae lau tala lea i le tulaga lea, e talafeagai leaga o le Tulafono lea tatou te talanoa i ai o se tasi o Tulafono e alu i se tasi o pou faavae o le tatou Pulega Malo saoloto. E lua lava pou faavae lea ou te vaai i ai i Tulafono Palota a Samoa. O le pou muamua, na o matai lava e mafai ona omai i totonu o le Maota lenei. O le filifiliga lea a o tatou tuaa, na o matai e omai i totonu o le Maota lenei.

O le pou lona lua, o le pule a le tagata palota e filifili ai lona taitai. O lea la tatou te talanoa i le tulaga lea i le resitala, le faamauina o faamaumauga mo le tagata agavaa e mafai ona faatino lana aiatatau e faatino ai lana pule. Tatou te talanoa e le gata o le taua o le pou lea e tatau ona tatou popole ma atugalu i ai pe a i ai se suiga e fai i ai, a o le isi tulaga e taua e tatou te popole ma atugalu i ai i le mea lea o le tatou tiute faa-sui usufono ona o lea tatou te omai i le Maota

lenei e fafau ai Tulafono. Lea tatou te talanoa i le Tulafono sili ona taua mo le aiatatau a le tagata palota i le faamauin o ana faamaumauga ia malupupiuia. O lea la o le maualuga o le tiute lea ia tatou, e tatau ai ona tatou popole e faaali o tatou manatu e puipui, e puipui le mamao e mafai ona tatou puipui ai le aiatatau a le tagata lea e palota e fai ai lana pule. O tulaga la ia e matagofie i lau vaai i manatu uma sa faaali.

E fia piiama i le manatu mulimuli lava lau Afioga i le Fofoga Fetalai ananafi, o manatu uma na faaalia e leai se manatu e le aoga faaaogaina uma manatu lava. E i ai lava si vaega lea ou te fia faamanino i lau maitau i tatou talanoaga, e pei foi lea ua nini faatasi le mea lea o le resitala mai fafo faatekonolosi ma le palota mai fafo faatekonolosi. Leai, o le tatou Tulafono lea e i ai nei na o le resitala mai fafo faatekonolosi. A o le resitala la lea o le upu lea e i ai i le tatou Tulafono o le talosaga, o lou talosaga mai e te fia alu i totolu o le resitala. O lou alu i totolu o le lola, e uma ona e talosaga mai e aumai uma au faamaumauga ia e i ai, ona tuu ai lea i ina seiloga e... Pe e te i Niu Sila pe e te i Samoa ae a e apalai mai Savaii i le tekonomosi e te toe... A e maua le Ofisa lea e o atu e faamaonia ou sefulu tamatamailima faamaonia ma lou ata faatoa tuu ai lea o oe i totolu o le lola palota. Ae le faapea a e talosaga mai loa e oso i totolu o le lola palota. E leai, e eseese mea na e lua. O le talosaga e taatia lava le talosaga se i uma ona faamau uma vaega ia o tamatamailima, faamau ma foliga ia ma manaoga ia e i totolu o le Vaega 20 o le Tulafono lea. E moomia ai le faamaonia e le faifeau, pulenuu o oe lea e te alaala i le mea lea e te fai mai e te alaala ai. O se tasi lena o tulaga lea...

O le isi tulaga lea e fia faamanino lava ona o lea e pei e foliga mai i le talanoaga i le suiga lea o le a sui ai o le a tiasi le tatou lola lea e taatia i le taimi nei. Leai, o le tatou lola lea na fai i faiga palota lea na uma atu o la e ola lava le lola lena. E leai se lola e pe seiavagana ua fai le tatou Tulafono. O le lola lenei e faaleaogaina atoa ae toe fai le isi mea fou. Pau le mea lea e fai o le suiga mai ona ua le gafatia e le system tuai le manaoga lea o tamatamailima ma foliga lea la e fai ai le mea lea e toe talosaga mai ona pau na o le auala o le malosiaga o le Komesina e mafai ona fai atu ai i tagata e omai e pue le ata ma le tamatamailima i lalo o le Tulafono. Seiloga e te malie e faatonu atu oe e te sau e fai le mea lea ona e sau lea, ae a leai se faatonuga e le sau foi le tagata. O le mea la lena lea e manaomia ai le Tulafono lea e Tau Faaofi atu.

O le aumaia o faamaumauga mai le lola tuai e alu lava i totolu o le system fou. O le system lea e transfer mai le isi itu i le isi itu ae tumau faamaumauga. e le aveesea lau aiatatau, lea na ou tautala atu ai i le taimi muamua i suiga ia o le faatekonolosi ma le system tuai i le system fou, e le aafia se aiatatau a se tagata o lea e i ai i totolu i le taimi lenei i le lola e le aafia foi se aiatatau i le talosaga mai ma faamauin o se tagata e talosaga mai. E fia faamalamalama la itu ia o le lola tuai la e ola. O tagata uma la e i ai na o le pau le galuega lea e fai e le Matagaluega o le o atu e toe faamautu le puega o le ata ma tamatamailima ae faaaoga uma lava le lola lea na tatou palota ai i le 2019 i le Faiga Palota e leai se isi e tiaiina. E na o le pau lava o le tagata fou, o le auvaega la lena e

talosaga mai e tuu i latou i totonu o le lola fou lea. Na pau la lena o le vaega e fou ai le lola o le faaopoopo o tagata talosaga fou, ae le faapea ua faatamaia le lola tuai e faamanino ai le tatou talonoaga.

I le...

**Afioga Aliimalemanu Moti Momoemausu Alofa Tuuau (Sui Usufono Tamaitai - Alataua Sisifo):** Lau Afioga i le Fofoga Fetalai...

**FOFOGA FETALAI:** Malie lau Afioga i le Minisita se i tuu atu le avanoa i le sui usufono tamaitai. Tulai mai lau Afioga Aliimalemanu sui usufono tamaitai mo Alataua i Sisifo.

**Afioga Aliimalemanu Moti Momoemausu Alofa Tuuau:** Ou te tulai atu i lenei taeao ma le agaga faaaloalo e momoli atu le agaga faafetai i lau Afioga i le Minisita, leaga e le i manino mai le tulaga lea i le taimi na faatalanoa ai la tatou mataupu i le Aso Gafua. Lea la ua manino aua a tagatagai foi i mea sa talanoa atu ai lenei itu faapena foi lena itu i le mea tonu lava lea ua e aumaia. Ae faafetai o lea ua manino o le data tuai lava o lea na o le transfer mai i le system fou ae na o biometrics la ia po o le ata ma le lima ma nisi foi o mea e fia teuteuina e toe fai atoa. O le popolega lena, faafetai tele lava ua malie foi lenei usugafono faafetai.

**FOFOGA FETALAI:** Malo faafetai.

**Afioga Sulamanaia Fetaiai Tauiliili Tuivasa (Vaimauga 1):** Lau Afioga i le Fofoga Fetalai mo le fia faasaoina o le taimi o le Minisita...

**FOFOGA FETALAI:** Mo le faasaoina o le taimi o lau Afioga i le Minisita se i tulai mai le sui usufono mamalu mo Vaimauga 1.

**Afioga Sulamanaia Fetaiai Tauiliili Tuivasa:** E faatalofa atu foi i lau Afioga i le Fofoga Fetalai i lenei taeao, malo lava i le faafoefoeina o le sa o le atunuu o lea ua oo mai i le aso mulimuli o lo o matagofie. Ae o le agaga faafetai foi lea e pei o le fesili tonu lava lena lea na fesili ai le Minisita o Tupe i le Matagaluega pe mafai ona transfer mai le lola tuai i le lola fou. O lea na tatou faalogologo uma lava i le tali a lau IT e le mafai. E pei la o le faalogologo lena lea na i ai ae sa tatau lava ona e saunoa atu o oe o le Loia po o le Faamasino e faamanino, ae na saunoa a lau IT e le mafai. O le mea lena la lena na matou faanoanoa ai lava ua tele ai le taimi, ona o le matou manatu ua le toe aoga le lola tuai lea e afio atu le Minisita o Tupe sa saunoa lava pe mafai ona toe aumai uma i totonu o le system fou ae sa tali le Matagaluega e leai.

A o lenei taeao e momoli le agaga faafetai lau Afioga e le selu atu o lea faatoa manino o le popolelga lena o matou, o le isi galuega tele ona o o lea ua le aoga lola tuai lea sa i ai. Ia ma lou faaaloalo lau Afioga i le Fofoga Fetalai.

**FOFOGA FETALAI:** Malo faafetai, malo. Ia tulai mai lau Afioga i le sui usufono mo Anoamaa 1.

**Afioga Alaiasa Moefaaououo Malagaitutogiai Sepulona Moananu (Anoamaa 1):** Mo le faasaoina o le taimi, e na o si mea lea e fia malamalama ai foi lo'u sui usufono i lau Afioga i le Minisita. Faafetai lava ua tele Minisita ia na saunoa i le mea e pei ua tau vevesi ai ma le mea a o lea la ua saunoa mai le Minisita e ona le Tulafono, o lea ua malamalama atu ai. O le mea la o le uiga o le resitala lea e tusa la pe transfer mai le mea tuai lea i le mea fou. A le faia biometrics e le i ai la i totonu o le resitala. E tusa la o le resitalaina atoa lena o le mea e pei o le mea tonu lea e tau tuli atu, po o le a le i ai i le tuai ae tatau ona e sau e fai mea fou ia, pue lou ata ona i ai lea. Pei o le sao lea lau Afioga. Faafetai.

**Tofa Hon Lauafo Fonotoe Nuafesili Pierre Lauofo (Anoamaa 2):** Lau Afioga i le Fofoga Fetalai...

**FOFOGA FETALAI:** Se i tulai mai lau Afioga i le Sui Taitai o le Itu Agai.

**Tofa Hon Lauofo Fonotoe Nuafesili Pierre Lauofo:** O lea ua manino le saunoaga a le Minisita ma o le tali foi lea i le tele o atugaluga ia sa faaalia. Ae pau lava la le mea ou te fesili atu ai i lau Afioga, se i silasila ane i le faaupuga o le Tulafono Tau Faaofi po o fetaui aua o lea e faaupu mai complete re-registration ae tatau ona sau se faaupuga e transfer mai pe download mai po o le a le faiga o le faaupuga sao e faaupu ai le mea lea ua e saunoa i ai. A o lea e aumai le faaupuga, complete re-registration, o lona uiga e toe o e fai atoa lava le mea lena. Masalo ai o le faaupuga lea ua tele ai finagalo e lagalaga. E pei o le fesili lea ma le faaaloalo.

**FOFOGA FETALAI:** Mo le faasaoina o lau Afioga i le Minisita, se i tulai mai le sui usufono mo Aleipata Itupa i Luga.

**Afioga Fuaava Suluimalo Amataga (Aleipata Itupa i Luga):** Faafetai mo le avanoa, faafetai atu foi i le Afioga i le Minisita o lea ua faamanino tulaga ia. E pei sa tele lava se manatu o lenei Itumalo o le taumafaiga lea ina ia... sa ou faaaaogaina le upu o le migration ma le mea foi lea, se interface e faaaaoga ai le SQL, a o lea la ua vaai atu nei, o lea e aoga uma lava. E pau la lea o le mea e avatu ai le agaga faafetai o lea foi ua manino lenei itumalo. Aua pei o le mea lea sa popole ai e tele le tatou information tuai lea ae leaga o le faaupuga sa maua i tatou Pre-Sitting e le mafai ona lona uiga e tele se isi tatou tapenaga e toe fai ai ni faamauamauga a o le measili o lea e aoga uma lava si tatou taavale tuai, na o le toe faafou lava o le afi fou ma tatou agai ai loa i le lumanai. Ma le agaga faaaloalo faafetai.

**FOFOGA AFETALAI:** Malo faafetai. Ia tulai mai lau Afioga i le Minisita.

**Afioga FAUALO HARRY JEFFREY SCHUSTER:** Faafetai lau Afioga i le Fofoga Fetalai.

**FOFOGA FETALAI:** Malie lava lau Afioga i le Minisita se i tulai maia lau Afioga i le sui usufono mamalu o Gagaifomauga 1.

**Tofa Hon Faimalotoa Kika Stowers-Ah Kau:** Faafetai lau Afioga i le Fofoga Fetalai, ua ta fiafia lava i lenei taeao ou te le i toe manao lava... O lea ua saunoa tonu lava le Minisita e pei ona ou talanoa atu ai ananafi, e toatolu, fa Minisita, ae na o ita lea e fai atu, e pei o i ina lea na nenefu ai lata channel a o lea na ou fai atu ananafi o lo o alaala filemu lava le Minisita e ana le Tulafono.

Lau Afioga i le Minisita, alo i ou faiva malo faafetai ua manino le mea lena na vevesi ai le fono i lenei vaiaso atoa o le lē manino a o lea la ua toe agai atu nai fesili laiti ia, lea ua manino atili. Malo lava faafetai. Faafetai alo i ou faiva. Le Komesina ma le aufaigaluega o outou mama na.

**FOFOGA FETALAI:** Faafetai. Malie lava lau Afioga i le Minisita se i tulai mai lau Afioga i le Minisita o le Soifua Maloloina.

**Afioga Hon Valasi Luapitofanua Toogamaga Tafito Selesete (Minisita mo le Soifua Maloloina):** Lau Afioga i le Fofoga Fetalai, ona o lea ua taua le tutu atu o e Minisita o le tiute lava lea o matou o le faufautua ma vaai i le Tulafono leaga o lea e i luga o le Kapaneta le tele o mea.

E mafua ona atu atu o le ao o le [.....] e lauga tulou le Maota ae le talanoa sao i le Tulafono. E lua lava mea na e sui i le Tulafono, o le lē faitau manino i le Tulafono a o lena e i totonu o le Tulafono. O le mea la lena e ala ai ona matou tulai atu ona o lea ua lautele... O le faasaoina o le taimi o le tatou Maota.

**Tofa Hon Faimalotoa Kika Stowers-Ah Kau:** Se faamolemole lau Afioga, ua faamolemole atu...

**FOFOGA FETALAI:** Ia ua i ai le... se i tulai mai le sui usufono...

**Tofa Hon Faimalotoa Kika Stowers-Ah Kau:** Ta te fia malamalama lava i faamaumauga pe i ai ni lapisi na ota fai atu ai, ta le i... vagana la ni lapisi a nisi sui usufono, ta te fia malamalama leaga o la e faafofoaga lo'u Itumalo po o ni lapisi o latou finagalo lea ou te faaupu atua faamolemole e le fetau ma lota manatu.

**Afioga Hon Valasi Luapitofanua Toogamaga Tafito Selesete:** Lau Afioga i le Fofoga Fetalai, e e le i saunoa le sui usufono i ni lapisi, a o lea ou te talanoa atu, ua mafua ona tulai atu ona ua lautele lana faauigaina e foliga mai o lou faauigaina lea ae tatau ona faitau lana Tulafono. O la e i le Tulafono le mea lea a o lea e pei e te i le Minisita... oi le sui usufono mamalu.

**FOFOGA FETALAI:** E faamalulu atu foi i lau Afioga i le Minisita ona e pei o le upu lapisi pei ua tetee mai ai le sui usufono mamalu. Ua i ai le manatu e aveese. O lea ua faatonuina le Failautusi e aveese ma faamaumauga.

Upu na faatonuina e le Fofoga Fetalai e aveese mai Faamaumauga o le Saunoaga a le Afioga i le Minisita o le Soifua Maloloina: “[*Lapisi*].”

**Tofa Hon Faimalotoa Kika Stowers-Ah Kau:** Aveese faamolemole lea mea o le lapisi leaga e le i omai ni sui usufono e avatu ni lapisi i inei faamolemole.

**FOFOGA FETALAI:** Ua i ai le manatu ..

**Afioga Hon Valasi Luapitofanua Toogamaga Tafito Selesete:** Lau Afioga i le Fofoga Fetalai, ia aveese le upu lapisi ae sui i le upu mea le aoga i le Tulafono.

**Afioga Peseta Vaifou Tevagaena (Faasaleleaga 5):** Lau Afioga i le Fofoga Fetalai...

**FOFOGA FETALAI:** I ae ua i ai le manatu o le... E famalulu atu i le sui usufono ua tulai mai e i ai se mea ua e finagalo ai agai i le...

**Afioga Peseta Vaifou Tevagaena:** Ioe e taua tele leaga o le mataupu tonu lava lea na lagalaga i lou taumafai atu.

**FOFOGA FETALAI:** I le Minisita?

**Afioga Peseta Vaifou Tevagaena:** Ae pei o le agaga lea faafetai o lea ua saunoa le Afioga i le Minisita, o le faigofie ia o le Tulafono a o le mea lea e nenefu ai le itu lea o le tali mai o Minisita e le ona ina le Tulafono. Ae faafetai i lau Afioga, faafetai i lau Afioga.

**FOFOGA FETALAI:** Malie le sui usufono mamalu ua e toe lagalaga foi Afioga i Minisita o lea ua uma ona saunoa manino le agaga o latou tali ona o le naunau lava ina ia faamalamalama atili. Se i tulai mai lau Afioga i le Minisita.

**Susuga Hon Laauli Leuatea Polataivao Fosi (Minisita mo Faatoaga ma Faiga Faiva):** E ava tele lau Afioga i le Fofoga Fetalai, e ava tele. Na ala ona matou tutulai atu e faamalamalama lou le manino, o le mafuaaga tonu lena a o lea lava e manaia le taeao e le o fia fusu se isi.

**FOFOGA FETALAI:** Ia talu ai o lea ua tatou taunu mai i le tatou taimi malolo o le taeao, ua i ai le manatu, o le a faataatiae...

**Afioga Peseta Vaifou Tevagaena:** Lau Afioga, na pau lava le mea lea e saunoa i ai le Minisita o le faalafi, na o le pau lava lea o le Minisita e lelei i le mea lea o le faalafi lau Afioga i le Fofoga Fetalai.

**FOFOGA FETALAI:** Se ua e... aua le toe toloa mai e lau Afioga i le sui usufono le tala lea ua fai atu e le Fofoga Fetalai.

O le a faataatiae Galuega a le Fono Aoao mo lana malologa o le taeao.

*Na faataatiae Taualumaga a le Fono Aoao Faitulafono mo lana malologa masani o le taeao i le itula e 10:35 i le taeao ma toe faaauau i le itula e 11:10 i le taeao.*

**FOFOGA FETALAI:** Ou te faasilasila atu ua toe amatalia nei Taualumaga a le Fono Aoao Faitulafono.

Ua matu i fau le taligasua a le paia o le tatou Maota, faafetai i le Atua i Lana foai, e talitonu foi ua maua se faasiliga malosi e faaauau ai a tatou galuega.

E faataatiae tatou galuega mo le malologa o lo o saunoa talifuaitau le Afioga i le Minisita o le Komisi o Faiga Palota i mataupu sa laga e sui usufono mamalu i le Tulafono Tau Faaofi o Teuteuga o le Tulafono o Faiga Palota 2024.

O le mea lea ou te tapa ma le faaaloalo lau Afioga i le Minisita e faaauau lau saunoaga.

**Tofa Hon Faimalotoa Kika Stowers-Ah Kau:** Faamolemole pe maua se avanoa, e faatulou atu i le Afioga i le Minisita.

**FOFOGA FETALAI:** Ia malie lau Afioga i le Minisita se i tulai mai le Afioga i le sui usufono mo Gagaifomauga 1.

**Tofa Hon Faimalotoa Kika Stowers-Ah Kau:** E tatalo atu lava ma lou agaga faaaloalo i lau Afioga e pei ona ota tatalo atu analaile, faamolemole aveese ia lapisi lea na lafo mai leaga o lea na fesootai mai nei lou Itumalo, o mea sa e tautala ai e le o ni lapisi finagalo o Tootooau o le atunu, o se tasi o Pule o Puleono i Salafai. Faamolemole ou te manao e aveese le lapisi lea na refer mai i faamaumauga. Ma le agaga faaaloalo.

**FOFOGA FETALAI:** O lea ua uma ona ave le faatonuga i le Failautusi o lea ua aveese. E leai se mea e atugalu ai lau Afioga i le sui usufono mamalu aemaise foi le faafogafoga mai a le Itumalo o lea ua tuuese le upu lea.

Tulai mai lau Afioga i le Minisita e faaauau lau saunoaga.

**Afioga FAUALO HARRY JEFFERY SCHUSTER:** Faafetai i lau Afioga i le Fofoga Fetalai. I le fesili lea faapea i le tali a le Ofisa e le mafai ona faaaoga mai ia... aumai faamaumauga la e i totonu o le system tuai i le system fou, a sao lau faamaumauga i le aso lea, o le tala a le Ofisa na fai mai e mafai ona

aumai le data, faamaumauga o igoa ma faamaumauga faapena la e mafai ona tuu i totonu o le system, ae le mafai ona aumai le tamatamailima ma le ata o foliga. E incomplete la le registration leaga o lea e le o faaipoipo mea na e lua i totonu o le sytem fou. O le saoga lena i lau maitau i le tala a le Ofisa. Ae pei ua faateia si a matou aufaigaluega e omai i totonu e pei se taua le mea la e omai i ai, e pei la o lena ua tau nenefu ai foi lea le latou tali a o le tulaga lena. Ona la o lea e le o mafai ona maopoopo uma mea e lua, e manaomia tamatamailima ma le ata, o le mafuaaga la lena lea e fai ai le Tulafono.

Sosoo ai lea ma le fesili po o le a le mea e faaaoga ai le upu complete re-registration. O le mea lea e manaomia o le tamatamailima ma le ata. A o le alu atu o le galuega ae te i ua tau le Komesina i se tagata e fesiligia, e manaomia la le malosiaga faale-Tulafono e mafai ai e le Komesina ona fesiliga le tagata lea e aumai ana faamaumauga i mea e le o sao e toe fesiligia. O le malosiaga foi lea ia faalautele le Tulafono e te avea i ai le malosiaga e fai ai le galuega lea i lo o le faalaitiiti ae tau atu i le mea e manaomia ona fai i ai se faaiuga ae le o i ai sou power faale-Tulafono. E pei o le tulaga lena o la e faaaoga ai le upu lena o le complete registration. E le gata o le complete i le faaipoipo o le data mai le system tuai ma le ata ma le tamatamailima i le system fou a ia i ai le malosiaga e fesiligia ai isi tulaga.

Lau Afioga sa i ai popolega i le online registration. O le manaia foi ia o fesili ma atugaluga i mea sa laga mai. O le tasi o mea taua na laga mai o le fesiligia lea o le aiatatau a le tagata i au information ina ia aua le soona tuusolo lea e tau faapapalagi o le privacy. E leai se tatou Tulafono privacy o i ai i le taimi lenei a o lo o mulimilitai le tatou Matagaluega ma isi foi Matagaluega a le Malo, o au faamaumauga ia e aumai na o le Ofisa o Faiga Palota la e faaaoga i ai. Na o oe lava e te alu atu a e manao i au faamaumauga e te vaai i ai, ae a alu atu se isi tagata e le avea i ai.

I le tulaga foi i le i ai o faamaumauga ia i tagata Palota e le o le Ofisa atoa e mafai ona o i totonu o le system lea e faamaumau ai ma vaai i faamaumauga la i totonu, e na o le vaega lava o le Matagaluega lea e faia faamaumauga ma le Pulega e mafai ona tagai i faamaumauga o tagata palota la e i totonu o le Lola Palota.

Sosoo ifo loa ma le isi fesili taua lava na aumai, o le puipuiga i le tulaga lea i le osofai mai o mea i onaponei e osofai le system pe hack le system. O lo o mulimilitai foi la le tatou Matagaluega i tulaga faaneionapo i le puipuiga. E faamalulu atu ia te outou o au e matua le iloa lava ma se mea tau computer a o la e fai mai e i ai le mea tau o le firewall mo puipuiga ia i auala e aua ai ne i mafai ona osofaia. E i ai foi le mea e tau o le access control list ma le secure socket layer. O puipuiga uma ia o lea e faaaoga e latou e puipui atu ai ma tetee atu i ni osofaiga faatekonolosi i le faamatalaga o le tagata palota o lo o i totonu o le lola.

O le isi atugaluga sa faaali mai aemaise la le online ia verify, ia faamaonia e le Matagaluega aemaise lava le online ia faamaonia o faamaumauga ia e aumai e le tagata lea e faamaumaua e moni ma faamaoni. E pei ona taatia atu i totonu o le Tulafono e mafai ona aumai lau talosaga e te toe sau ai e fai le tamatamailima ma pue lou ata a o la foi e i ai le Vaega 20 o le Tulafono lea e

tatau ona faamaonia uma isi tulaga. O mea uma la na e faamaonia o le tiute o le Ofisa la e i ai i le Tulafono e faamaonia le tulaga lena ae le i tuuina lou suafa i luga o le lola palota.

**Afioga Fuaava Suluimalo Amataga (Aleipata Itupa i Luga):** Lau Afioga i le Fofoga Fetalai...

**FOFOGA FETALAI:** Malie lau Afioga i le Minisita se i tuu atu le avanoa i le sui usufono o Aleipata Itupa i Luga. Se i tulai mai lau Afioga.

**Afioga Fuaava Suluimalo Amataga:** Faafetai mo le avanoa. Faafetai o lea ua manino le sunoaga a le uso a Minisita i le tulaga lea i le verification aemaise lava le security o lea ua ttau ua i ai firewall ma tulaga ia. Ae pei o le tulaga na taumafai atu ai i le tulaga lea e verification o se mea foi lea e faamaonia aemaise lava lenei talutalufou, masalo ua silafia uma e lenei Maota le mea le tau o le AI, Artificial Intelligence. Tusa la o le mea lea ua mafai ona pei e faaaoga le technology ina ia mafai ona solidification le tagata ua mafai lava ona saunoa mai le tagata i upu na te le i faia, e pei se animation foi lea. Ia o nai mea na na sa tau i ai se mafaufauga pe faafefea ona verify le reality lea i tatou fingerprints ma mea ia ia ma se mea foi lea e fai mai lava e se isi aua o lea ua tupu lava i le taimi lenei, a fia maua lava e se isi se ata ua fetagofi liliu. E pei o nai tulaga ia e na o se mea e taatia atu pea i le tuualalo i la outou aufaigaluega aemaise le IT i le tulaga ia aua because it's all part of security. O le safety leaga o le talutalufou lea tatou te tau tapena tatou i le tatou system fou, a o lo o alu foi i le atoa i luma le malamalama o ē foi e mafai ona faia ia Polokalame faapea ne i te i ua faaseseina ai le tatou system i se isi taimi o i luma. Ae pei na o se mea foi lea e faataatia atu pea e agai ai taapenaga a le tatou aufaigaluega mo le agai i luma.

Ma le agaga faaaloalo. Faafetai.

**FOFOGA FETALAI:** Malo faafetai. Ia se i tulai mai lau Afioga i le Taitai o le Itu Agai.

**Susuga Hon Tuilaepa Fatialofa Auelua Saialele Malielegaoi:** Lau Afioga i le Fofoga Fetalai, e le o se mea leaga le avatu pea o fautuaga, leaga o lea tatou e taufai faitau uma i mea faapenei o la e tutupu i fafo. O le po o le Aso Lua na sau ai foi le faasalalauga i le news a le lalolagi i le mea lea i le ata lea na faasalalau mai i le TV 1 o le ata o Trump la e faauouo e tagata uli, ae na faaaoga la i ai le tekonomosi lea o le AI, Artificial Intelligence. A o la e la e sau, e fake uma lava mea. Afai o la e mafai ona fai e Amerika i totonu o Amerika o la e fai e Rusia. O le talanoaga i le aso ananafi ea a tagata Siamani, a Taitai Siamani ma le NATO e faatatau i le fesoasoani e ave i o ia Ukraine ae nonofo Rusia ma faasalalau mai le talanoaga, a o le talanoaga na fai faalilolilo. O lea foi e faasalalau mai le gaoiga tele lava o le Central Bank of America ma le Bank of England. O banks tetele ia a le lalolagi e faigata ona oo i ai le tekonomosi, na gaoi, ae faatoa pue mai o e le tagata i Sri Lanka e le isi foi bank i Sri Lanka. E ala la ona fai atu mea ia leaga o tatou e fou i nai mea ia, a o lea foi e tau mai e

ova i le 10,000 hackers ia e i totonu o Samoa, lea latou te gaoia uma information mai le telefoni a le ma le telefoni a lea.

O le tulaga la lena e ala ona matou avatu ai faantuaga, e leaga o le lalolagi lea ua tatou i ai ua malosi tele le tekonomosi, and who are we? O tatou e le i taitai i le mea lena.

Lau Afioga i le Fofoga Fatalai o se tuualalo.

**FOFOGA FATALAI:** Malo faafetai. Ia se i tulai mai le sui usufono mo Falelatai ma Samatau.

**Afioga Lupematasila Galumalemana Tologata Tile Leia (Falelatai ma Samatau):** Lau Afioga i le Fofoga Fatalai o lea ua saunoa le Afioga i le Minisita i le security lea sa avatu ai se tuualalo a lenei foi Itumalo. Ae pei o le popolega lea e i ai aua o se taimi muamua lenei ua developed ai po o ua fausia e tatou tagata faigaluega a le Matagaluega le system lenei.

O le popolega lea e i ai lenei Itumalo a under pressure le Komesina ma le Ofisa o Faiga Palota e le Minisita po o le Palemia po o le Faigamalo e tulai mai i lea taimi i lea taimi e fai se faiga faasolitulafono i le system, e faigofie ona fai aua o tatou lava tagata faigaluega lea na develop ina le system ma mafai ona latou manouver ina le system. E le o fai atu se faamatalaga o le Faigamalo o lo o tulai mai lenei taimi, ae po o ai lava le faigamalo e tulai mai lea taimi i lea taimi, e pei o le atugaluga lea o lea e tau polepole i ai lenei Itumalo, ona o lea ua fausia e o tatou tagata i totonu o le Ofisa le system, instead o le ave i se third party e latou develop ina le system lea ina ia mautinoa le security o tatou faiga palota. E pei o le agaga lea ma le faaaloalo.

**FOFOGA FATALAI:** Malo faafetai, se i tulai mai le sui usufono mo Vaimauga .

**Afioga Sulamanaia Fetaiai Tauiliili Tuivasa:** Lau Afioga i le Fofoga Fatalai mo le faasaoina o le taimi. O lea ua talanoa i le system sa avatu ai foi se manatu o lenei Itumalo ona o le popolega foi lea e faapea o se system faatau mai fafo. Masalo o lo o maua i faamaumauga ne i te i ua ao atu tatou a o la e po le atunu lea e aumai ai le system. A o lea ua faalogologo ma le totoa i le saunoaga a lau Afioga e momoli ai le agaga faafetai, o lea e polokalame lava ma faatino e le aufaigaluega. E momoli ai le agaga faafetai a lou nei sui usufono ona o tatou lava tagata lea e faaaoga.

O le popolega lea na i ai lou sui usufono faapea o se tulaga mai fafo o le tele la o le tupe e alu ai, e pei ona ou fai atu e le gata o le a le mea lea i luga o le system ua le oo i ai lo tatou malosi ia telefoni i vaega e ana le polokalame ma le system, e totogi foi. A o le tulaga la o lea faatoa maua, e faafetai atu i lau Afioga i le Komesina ona o le agavaa foi o lau aufaigaluega, ou te le selu atu ae o tatou lava tagata o lea ua faatinoina le tatou polokalame, o le popolega lena o le sui usufono ona o le tele o se tupe ma lou popolega i le cost o le system pe ana faapea o se mea e faatau mai fafo. A o lea e maua e momoli ai le agaga faafetai nai o tatou tagata o lo o tuu i ai le faatuatuaga aua o tatou e pei e tau

loa tatou tagata e pei e faapena, ae sau loa le palagi pe sese lava le system a le palagi e pei e faapena ae momoli le agaga faafetai.

Lau Afioga i le Fofoga Fetalai, e faanoj atu ona o nei o lo o faapena toe sauniga o si o matou faifeau e avatu ai le faamaisega foi i le Afioga ia Tupou Salapo i si o tatou nuu o Laulii o le lupefaalele a lenei Itumalo o nei ona toe sauniga. E faamaise atu ai i si o tatou nuu o Laulii aemaise si o tatou nuu o Vailele ona o le valaau paia a le Atua i le lupefaalele a le tatou nuu.

Ia o le agaga lena faafetai tele lava i lau Afioga i le Fofoga Fetalai i lou alofa mai i lenei usugafono ae faafetai o lea ua malamalama o tatou lava tagata lea e faia le system.

### **FOFOGA FETALAI:** Faafetai. Ia...

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai, e le o se faasilasilaga o se maliu po o se faanoj, o le fesili e agai i le Afioga i le Minisita i le Tulafono Tau Faaofi. Faafetai mo le avanoa.

O lou foi lea taofi ma lau faalogo i le tatou semina foi lea le Pre-sitting lea na fai. O lea sa ou faalogologo o faapea mai le mau a le tatou Ofisa o lea lava e tuufaatasia e le IT o le tatou Ofisa le system. A o lea foi sa ou faalogo ananafi i se tasi o Minisita o saunoa faapea o se system na avatu i luma e le Komiti o Tauofoga po o le Tenders Board. O au la lea ua le manino nei po o ai lea... a o fea lea e aumai ai le system lea e faaaoga e tatou po o se system lea lava o create pe gaosia pe tuufaatasia e le tatou Ofisa ia po o se system o lea e aumai fafo. Ua ave i o i le Tenders Board po o le Komiti o Tauofoga lea la e talanoaina nei. E pei la o le mafuaaga lea ua ou fesili ai foi ona o le saunoaga a le sui usufono lea ua mavae atu nei, ia o lea foi e i ai le tau, le taugata o le system lea ua faaaogaina e tatou po o le a faaaogaina. A o i foi la lea e fesiligia ai le malupuipuia o le system pe a faapea o se system o la e aumai fafo a o la e control mai la e latou po o ai le kamupani lea e faia le system lenei. O le mea lea e tapa ai se saunoaga faamanino a lau Afioga i le system lea ua taua ma le faaaloalo.

**FOFOGA FETALAI:** Ia, se i tulai mai le sui usufono mo Safata. E faamalie atu i lau Afioga i le Minisita mo le faasaoina o lou taimi.

**Afioga Leaana Ronnie Posini (Safata.1):** Faafetai tele i lau Afioga i le Fofoga Fetalai. Faafetai tele lava i lau Afioga i le Minisita, ua manino a ma malamalama le folasaga ma le faamalamalamaina o le tatou Tulafono i mea o lo o fia malamalama ai le tele o le tatou Palemene. Leai, ua ou toe tulai atu lava o le mea lea o le security pei foi ona ou taua o le system e le i faataitaia muamua. Pei o le ala lea e ala ai ona tau polepole ina ne i alu alu ona faaletonu lea aua ua oo i le taimi o tatou faiga palota.

A o le isi mea e faasaoina i lau Afioga i le Minisita, lea na ou taua o faamaoniga o le resitala aua lea ua mautinoa mai le Tulafono o le resitala o le sitiseni Samoa. Lea e manino lelei lava. E pei la lea na ou faaalia i le taimi ua

sola ia malamalama lelei ai foi le tatou Maota o tulaga ia aua lea ua tatou iloa e agavaa matua lea na... ma le agavaa o fanau, le agavaa foi o fanau a fanau, Lea la e tulai mai ai o matua ua agai i Niu Sila ona fananau uma lea i Niu Sila po o Ausetalia po o Amerika o fea lava, fananau uma mai fanau nei na soifua uma lava i Amerika toe fananau a latou fanau e soifua uma lava, e le i oo uma mai i inei Samoa lea e tau e tatou i le tatou Tulafono lea o le first generation ma le second generation, ua agavaa i le sitiseni.

O le fesili la; a oo mai la i inei e fai?... aua o lea ou te vaai atu i le Tulafono e te resitala i le itumalo i le mea na e nofo ai. A o nai o tatou alo ia ma... e le i oo mai i Samoa, e le iloa foi... e le i nonofo inei. Ou te le iloa la pe resitala pea e tau o le mea la e nonofo ai o Amerika po o Rusia po o fea lava. Aua e tau... o le mea lena na ou fai atu ai e feteenai ma le Tulafono. O le ala ai foi lea na ala ai ona talatala i tua lau tala...

**Afioga Hon FAUALO HARRY JEFFREY SCHUSTER:** Lau Afioga i le Fofoga Fetalai...

**FOFOGA FETALAI:** Ia, masalo lea ua maua mai e le Afioga i le Minisita le faauilavea. Saunoa mai lau Afioga i le Minisita.

**Afioga Hon FAUALO HARRY JEFFERY SCHUSTER:** O lea ou te maua lou finagalo. Faafetai i lau Afioga, o lea ou te maua lou finagalo, o lea e le i oo atu i ai ae o lea ua e fesili faalua le fesili e tasi ae ou te oo atu lava i ai. Se i tali muamua le fesili i le tulaga lea tau security.

E taua le tulaga lea na saunoa ai le Afioga ia Lauofo. O le vaega lea na design ina, o alo ma fanau o le tatou atunuu ua iu mai i Iunivesite i le tulaga lea tau IT, o latou ia na faigaluega i totonu o le Matagaluega ma maitau vaivaiga o le system lea na faaaaoga mai le 2005 faasolo mai ai. A o le kamupani lea mai fafo lea latou te galulue i le design o le NEC. O latou la lea e omai galulue faatasi ma le tatou Matagaluega fai uma lava tulaga lea tou te talanoa i ai. O le tulaga tau security o le maualuga ia o le vaai a le... E le o faatamala le tatou Ofisa i le tulaga lea o le security. O le tulaga lea i le popolega faapea o le AI, leai, e aumai au faamaumauga ae e te sau i le mea lea e i ai le tagata o le aufaigaluega i i a le Matagaluega i le mea lea e oo ai foi le vaega lea e talosaga mai fafo. E te sau lava i inei se i vaai mata le tagata lea e faia le resitala i le pueina o lima ma ou foliga ia oe lea e ona le pepa lea na sau online. Ia, ae tumau lava atugaluga i le tulaga lea o le osofai o le hack, o le mea foi lea o le hack leaga o le mea a lea e fai e tagata ia. Ae o lo o tau... o lo o galulue lava le tatou Matagaluega i le mamao e oo i ai i tulaga foi o la e i ai i le taimi nei e puipui i tulaga faapea. E pei o se faamalamalamaga atu lea.

Faafetai i le atugaluga, popolega faapea a resitala online o le a matuai toatele lava le lola ia sa aumai faamaumauga e selau afe fia sefulu tagata na tau mai ae selau afe foi tatou lea e i totonu o Samoa. I totonu o le tatou Tulafono, o le manino ia, tasi lea Tulafono o le leva ia, na saunoa ai le Taitai o le Itu Agai, o

le tele ia o faafitauli i aso ia ua tea atu leaga e mau le Tulafono i se tasi vaega ae suisui i lona faatinoga. E pei o le tulaga lea i le tatou piitaga faa-Samoa, tatou Tulafono sa i ai... sa i ai le... e te palota i le mea e te nofo ai. Ae a faapea o lou Tina e sau mai Aleipata a o lou Tama e sau mai Safata, ia e mafai ona e alu e resitala i tua ona o la e i ai lou piitaga faaleaiga. A o lea e tasi lea suiga lelei o le tatou Tulafono lea e i ai, lea ua toso mai lava le tagata palota na o le mea e te nofo ai e te resitala ai. E tusa lava la pe na o le tasi le tagata lea e ave i ai le avanoa e fai lana filifiliga, o le matai. Ona a ese le mea e matai ai ma le mea e nofo ai e i ai lana filifiliga e alu ai. Ae ala ona fai le mea lena, leaga foi o le tatou faiga faavae lea e i ai na o le matai e mafai na alu i le palota, lena e mafua ai. A o oe la le tagata palota tusa pe i ai lou piitaga i Aleipata po o Savaii a e le igoa matai e te palota lava i le mea na e te nofo ai. E le pei o le mea sa i ai i aso la e wholesale le avega o le tatou aiga pe a faapea e i ai se tatou tei e alu i le palota, ia tatou te o uma i tua e palota i tua.

O le Tulafono lea e i ai nei e tutusa uma lava tatou o lea e i Samoa ma tatou foi o loo alaala i fafo. A e talosaga mai e te fia palota, muamua, 21 ou tausaga. Lona lua, o oe o le sitiseni Samoa o le Vaega 14 lena. Sosoo ifo loa i le Vaega 15 o la e fai mai, e ao ona e resitala i se itumalo e tasi, palota e tasi i totonu o Samoa. Sue ifo loa le isi vaega la e i lalo ifo, e resitala oe i le mea o lo o e nofo ai. A sue la le mea o lo o e nofo ai, a faapea o lea e te nofo nei i totonu o Samoa, 6 masina o e aumau i le mea lea e resitala ai oe i ina. A faapea e te le o aumau i Samoa o la e te nofo i fafo, e sue la le mea sa e nofo ai i le taimi mulimuli lava na fai ai le faitauaofai o tatou tagata i totonu o Samoa. A faapea la na e alu ese atu ma Samoa ae le i faia le faitauaofai lena e le mafai ona e resitala tusa lava pe e te sitiseni, 21 tausaga. E tutusa le mea lena mo tatou lea e i totonu o Samoa tutusa ma le vaega lea e i fafo. E leai la. E oo foi la i le tulaga lea sa i ai foi le fesili e aiga ma le fesili lea faapea pe faapefea le auvaega lea le second, third generation sau fai le igoa matai. Ia, sau nei fai le igoa matai lona uiga o le a alu e palota. Leai, e fai lou igoa matai ae le tietie i le ea lou igoa matai. Pau lava le mea e fai i lou igoa matai e i ai lau filifiliga. Pe e te palota i le mea e te nofo ai pe e te palota i le mea o la e te matai ai. E le mafai ona e sau e oso i le palota i lou matai, e te le i nofo i totonu o Samoa, e le i resitalaina oe. Ma o le tatou Tulafono lena o lea e faataoto nei. O le mea taua o le Tulafono o le mea e te nofo ai, e te qualify e palota, sitiseni Samoa, 21 tausaga ma le mea sa e nofo ai i totonu o Samoa i le vaitaimi lea. E leai se isi taimi e tatala atu i tua.

**Tofa Lealailepule Rimoni Aiafi:** Lau Afioga i le Fofoga Fetalai.

**FOFOGA FETALAI:** Ia, malie lau Afioga i le Minisita se i tuu atu muamua lava le avanoa lea i le sui usufono mo Faleata.

**Tofa Lealaepule Rimoni Aiafi:** Faafetai lava i lau Afioga le Fofoga o le Fono mo le avanoa lea. Faafetai foi i le Afioga i le Minisita ua faamanino le vaega lea sa... A tatou talanoa i le resitalaina o tagata palota, e amata mai le

Vaega 13 seia oo mai i le Vaega 21. O le mea lea lena sa popole ai le feteenaiga, lea ua saunoa sao lava le Afioga i le Minisita i le mea lea ua ave i ai le faamuamua ma le faataua o le mea e nofo ai, o le mea e nofo ai. E le toe i ai se manatu e taofi le mea lea ua faaalu. A o le mea lea e avatu ai le fautuaga o le online mo le taimi nei. Se i toe tilotilo la outou i vaega ia. O le mea lea na aumai le... Ina ua pasia le Tulafono i le 1962, o le Savings Provision lea na sau ai lava mai le taimi lena lea na mafai ai ona palota o tatou tagata. O le tala a faitau i ai i faamaumauga, o le finagalo o Tama sa i ai ma tatou, ona o le tele o nai o tatou tagata ia ua o i Niu Sila ma Ausetalia i le vaitaimi lea, ae tatau na palota mai. Lea la na ave i ai le avanoa ma tuu i ai le mea lea ua sau ai lava e oo mai i le aso.

A o le mea la lea e fia iloa lea ua e saunoa sao ai i le mea lea lau Afioga i le mea e nofo ai, leaga o le faamuamua lena ma le verification. Aua o le toatele la ua i fafo ua le toe i ai ni fale i inei, e le toe nonofo i inei. O le mea la lena lea e taua ai le toe... O lau fautuaga i lau Afioga, faaalu le mea ia e leai se isi e taofia. Tagata ia e i Samoa ma tagata ia masani ona toe foi mai ma galuega faavaitaimi aua o tulaga lea na amata ai le online. A o le toatele la o Samoa ia e i ai nei, ia o le mea lena e tatau ona tagai i ai lau Afioga ma le Matagaluega leaga o le verification lena o le mea e nofo ai e le iloa e tatou po o fea le itumalo e nonofo ai. Maumau pe ana pei tatou o Fiti, e tasi lava le itumalo. Ioe. Ua tatou talanoa foi i le tele o faafitauli o le Tulafono, ia o lena e afio mai le Afioga i le Tamaitai Palemia o ia e malamalama tonu lava i le Tulafono lea ua leva na galue ai. Ae o le fautuaga lea i lau Afioga i le Minisita. Faafetai.

**FOFOGA FETALAI:** Mo le faasaoina lau Afioga i le Minisita, se i tulai mai le sui usufono mo Safata 1.

**Afioga Leana Ronnie Posini:** Lau Afioga i le Fofoga Fetalai, e momoli atu le agaga faafetai tele i lau Afioga i le Minisita. O le ala tonu lava lea na ou lauga ai o le mea lea o le sitiseni, a o lea la ua faamanino mai e le agavaa uma sitiseni Samoa i le tatou resitala lea ma le faiga palota. E pei ua tau tele le sese, ua fenumiai le Tulafono ona o le tulai soo mai o le Afioga i le Minisita mo Faatoaga ma le Minisita mo le Soifua Maloloina ua tau sese ai lau Tulafono. A o lau Tulafono, e matua selau lava pasene. Faafetai.

**FOFOGA FETALAI:** Ia, tulai mai lau...

**Afioga Hon Valasi Luapitofanua Toogamaga Tafito Selesele:** Lau Afioga i le Fofoga Fetalai.

**FOFOGA FETALAI:** Ia, se i tulai mai lau Afioga i le Minisita mo Soifua Maloloina.

**Afioga Hon Valasi Luapitofanua Toogamaga Tafito Selesele:** Ou te le iloa i le sui usufono lea pe i ai se mea e lotoleaga ai ia te au, ae ese lou fiafia i ai i ona manatu. Ae na ala ona ou tulai atu, e tau faasao ona mafaufauga sese, ia ma mea la e aumai e le sao. A o lea la faatoa... a o le Tulafono la e i ai uma mea na. Ua leva foi ona faipule le sui usufono ae le malamalamā i le Tulafono. Ia, e faamalulu atu, a i ai se mea o le ta va e te ita ai ia te au, ia faamama i le aso aemaise foi o lenei itu. Faafetai.

**FOFOGA FETALAI:** Malo. Ia, mo le... Se i tulai mai Faleata 4, le Igoamatua.

**Tofa Ale Vena Ale (Faleata 4):** Faafetai i lau Afioga i le Fofoga Fetalai mo le avanoa. E momoli atu le faafetai tele i lau Afioga i le Minisita e ou le Tulafono. O le agaga ua ou tulai atu ai, ona o lea o le a resitala tagata palota aemaise o le itumalo lenei o au e toatele tagata o lo o fai mai i totonu, aemaise i Puipaa, fanua ia faapena foi Toamuauta, fanua ia o le Malo lea ua faamatuu mai mo le afioaga nei. I le suafa matai la, o le toatele o tagata lea ua omai nei lea e nonofo i o e mananao e fia resitala. Pe e te matai i Savaii ma na, ae a e resitala i i le mea lea e nofo ai i Toamuauta po o Puipaa, e manao e resitala pea i lona matai. E pei o le agaga lea lau Afioga i le Minisita ma le faaaloalo lava faafetai.

**Afioga Hon FAUALO HARRY JEFFREY SCHUSTER:** Ia, faafetai i lau Afioga i le Fofoga Fetalai. Ia, faafetai foi i le Afioga i le Igoamatua mo le fesili. Ia, o le tatou Tulafono lea e i ai i lau Afioga, na o le matai lava e i ai lana filifiliga pe palota i le mea e nofo ai po o le mea o la e matai ai. E i ai la lana filifiliga ae ou te iloa o le faiga o le faaiuga na o le a le faigofie foi mo le tagata lea e matai. Masalo seiloga o la e fia alu e palota. Ia, aua a alu la e palota i le isi mea ae o le miliona la e tufa i le mea lea e nofo ai. Ia, o lona uiga e alu atu i le tagata lea e faasoa le tamaoaiga foi, e alu lava i o i le mea e te palota e aveifo ai lau tupe o le miliona. Ae o le aiatatau a o le matai pe a fai lana faaiuga e alu e palota i le mea la e matai ai.

Lau Afioga, sa i ai foi le atugaluga na faaali mai i le tulaga foi lea i nuu tua e tau leai ni computer. E sao le atugaluga a o le faaaogaina o le auala lea faatekonolosi, e le gata o le computer ae mafai foi ona faaaoga lau telefonu feaveai i le gaoioiga lea e faagaioi ai e le Ofisa pe a e manao e te resitala mai i luga o auala faatekonolosi. E mafai la ona faaaoga le telefonu feaveai ae o le taua ia i fuafuaga a le Matagaluega e moni o lea e tatala le avanoa i auala faatekonolosi a o la e faataua e le Matagaluega le mea lea ia o atu e vaai tagata ma resitala tagata. Po o le omai foi o tagata i totonu o le Ofisa e toe faamaonia le pue o latou lima ma o latou ata. A o le laualuga lena ma le faataua lea e ave e le Matagaluega, o le tatala atu o le faatekonolosi ae le taofia ai le gaoioiga o galuega ia o e taamilo e faa-resitala le mamalu o le atunu.

E iai foi le atugaluga lea sa faaali i le faatamilo atu o le Matagaluega. E le o tagata uma o le alaalafaga ma le afioaga la e i totonu o le taimi e i ai le aufaigaluega. E sao lelei lava ma o lo o faataatia foi e le Matagaluega ia fuafuaga e tali ai i tulaga ia i le taimi e asiasi ai i nuu ma alaalafaga i le tulaga lea.

Sa fesiligia foi le mea lea o le dual citizenship o le malamalama i le fesili o le tatou Tulafono e pei ona taoto ai i le taimi lenei e tusa lava pe lua sitiseni a o tatou tagata ae a faapea o le sitiseni Samoa e mafai a ona sau i le sitiseni Samoa. A faapea ua 21 ma nofo i totonu o Samoa ia e mafai ona sau lava talosaga e palota i totonu o Samoa e ui o la e i ai foi le isi ona sitiseni i se isi mea. O le fesili agai pe a i ai ni...

**Afioga Fuaava Suluimalo Amataga:** Lau Afioga i le Fofoga Fatalai, faamolemole.

**FOFOGA FETALAI:** Ia malie lau Afioga i le Minisita se i tuu atu le avanoa i le sui usufono mo Aleipata Itupa i Luga.

**Afioga Fuaava Suluimalo Amataga:** Ia faafetai o lea ua saunoa manino le Minisita i le tulaga lea, le tagata lea e lua sitiseni o le Niu Sila toe Samoa. A i inei la i Samoa ou te iloa lea e faigofie e resitala e palota i Samoa, ae pei o se faafesili foi lele o lo o faaaoga i le faaupuga o le fair treatment foi lele, o le sitiseni Samoa a o la e nofo i fafo. Leaga o lea i ai tatou penalties ia e apalai i le tagata e le resitala i le palota lea e i ai lona penalty ma le tagata ua resitala ae le palota foi ua i ai foi lona faasalaga. Ae pei o si mea lea foi lele po o le a lona tulaga. Pe na o le tagata e dual citizens foi lele a o lea e nofo i Samoa o la e faamalosia, ae faafefea le tagata e sitiseni Samoa a o la e nofo i fafo ona o la e foi e sitiseni i fafo. E aapo mai totonu i le tatou Tulafono e tatau foi ona resitala? E pei o si mea lea foi lele o lea e le o tau manino i ai lo'u sui. Ma le agaga faaaloalo.

**FOFOGA FETALAI:** Tulai mai lau Afioga i le Minisita.

**Afioga Hon FAUALO HARRY JEFFREY SCHUSTER:** O le tatou Tulafono lea e tuuina atu a faapea o oe e sitiseni Samoa ua 21 ou tausaga e te agavaa e te talosaga e palota i lalo o le tatou Tulafono, pe e te nofo i Samoa pe e te nofo i fafo e te talosaga mai. E aafia ai foi la le tulaga lena i le faasalaga foi lea pe a le resitala. O le tulaga e faigofie ona faatino le tulaga lena i le tagata o lea e nofo i inei a o le tagata lea e nofo i fafo, ia seiloga e sau i inei. O le autu o le mea nei ia tutusa le treat ina o tagata e agavaa e le faapea e i ai lou alofaga pe a faapea o la e te i Niu sila, ae prosecute le tagata o lea e i totonu o Samoa.

**FOFOGA FETALAI:** E i ai se isi mea lau Afioga i le sui usufono mamalu?

**Afioga Fuaava Suluimalo Amataga:** Lau Afioga i le Fofoga Fetalai, e pei o le tulaga lea ua faamanino mai e mafai ona prosecute le tagata o lea e i inei Samoa, a o le tulituliloaina la o le tagata lea e sitiseni a o la e i fafo ua le sau e palota po o ua le resitala, e faafefea la ona apalai tatou faasalaga ia? Leai o se mea foi lea tatou te tapenapena i ai pe a sau loa i nei ua fai le stop order i o e totogi lana sala ae le i toe alu i Niu Sila. E pei o se mea foi lele, leaga o alagatupe a le tatou Malo ae pei e mafai ona enforce ia i tatou ia sitiseni Samoa lea e i totonu o Samoa a o sitiseni Samoa o la e i fafo. E pei o le tulaga lea o lea e tau popoe ai po o le a le tulaga. O lea e ala ai ona fai atu ia fair le treat ina o sitiseni Samoa. Ma le agaga faaaloalo.

**Tofa Lealailepule Rimoni Aiafi:** Lau Afioga faamolemole lava...

**FOFOGA FETALAI:** Mo le faasaoina o le taimi o lau Afioga i le Minisita se i tulai mai le sui usufono mo Faleata 3.

**Tofa Lealailepule Rimoni Aiafi:** E pei o le mea lea na avatu ai lau tuualalo i lau Afioga i le Minisita ona a tatou tilotilo i Vaega o le Tulafono le Principal Act, e i ai mea e ono delay ai le tatou faamoemoe. E pei la o le mea lea na saunoa ai le sui usufono leaga o lea e manino lava le upu e faamalosia, a! E compulsory. O lona uiga sa tatau ona toe sui mai le Tulafono e faamalosia le resitala o i latou o lo o nonofo i Samoa. O lea la e pei... pe afai o fuafua mai se isi suiga mo vaega ia ona talafeagai lea o le tatou Principal Act, ae faasolo le Tulafono ia mo i latou e mafai ona faatino aua a tatou mulimilitai i le Principal Act e tele mea e ono taofi ai le... aemaise lava i le online ae taatia mo le... e faaoo lava i le faasologa ae leaga e tatau ona tapena mai nai suiga mo le Principal Act ma le tau fesili o sui usufono. Ma le faaaloalo lava.

**FOFOGA FETALAI:** Ia tulai mai lau Afioga i le Minisita...

**Afioga Hon FAUALO HARRY JEFFREY SCHUSTER:** Lau Afioga i le suiga o lo o i ai e tutusa le treat ina o tagata sitiseni uma Samoa e tatau ona apalai. Na pau le eseesega lena, o le tagata e nofo i inei e mafai ona molia a o le tagata la e i fafo ia seiloga e sau i inei faatoa mafai ona fai le moliaga ae tutusa lava. A e le apalai o le mea lava e tasi, o le mea na lena lea e avatu ai le suiga.

O le tulaga ina ne i te i ua i ai ni afa, o le tatou Matagaluega ua tapena foi i ai po o a ni afa po o a ni mea e tutupu, a tea loa mea na, ona toe tapena lea e faaauau le tatou galuega i le resitalaina o tagata.

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai o se mea e fia malamalama atili ai faamolemole...

**FOFOGA FETALAI:** Ia tulai mai le Sui Taitai o le Itu Agai.

**Tofa Hon Lauofo Fonotoe Nuafesili Pierre Lauofo:** Ia ona o lea ua tau foi si numi i le faalogologo atu i isi vaega ia ua oo i ai le saunoaga a le Afioga i le Minisita e tusa ma fesili ia a sui usufono mamalu. E i ai latou e faamalosia ai le Tulafono e i ai foi i latou e le mafai ona faamalosia i ai le Tulafono ona o lo o i atunuu mamaao. Ae tau lava ona faamanatu atu i lau Afioga i le Minisita e le faatagaina i le Tulafono Faavae ona discriminate ia tatou Tulafono. E tau lava na ou faapena atu aua o mea a ia e aveave foi tele ai faamasinoga pe a maea le tatou Faiga Palota. O le isi itu lea sa taumafai atu ai isi sui usufono o le matou itu ina ia tau foia ai foi o a Teuteuga e fai e tau foia ai le tele o le mau faamasinoga e tulai mai mulimuli. Ia ma le faaaloalo lau Afioga.

**FOFOGA FETALAI:** Ia tulai mai lau Afioga i le Minisita.

**Afioga Hon FAUALO HARRY JEFFREY SCHUSTER:** Faafetai i lau Afioga mo le fautuaga ia o le tulaga foi lea i le taatia o le Tulafono ua i ai nei, ia e moni e mulimuli ane prosecute a o la e tutusa le treatment e oo i ai le Tulafono e ui ina tuai ona faatino mo le isi tagata e nofo i fafo.

E taua le fautuaga ae na o le tasi le isi mataupu lea o le agavaa sitiseni pe te i ua aafia ai isi tulaga i benefiti e maua i Samoa pe afai o sitiseni ia e palota mai fafo ae te i ua omai o i le NPF. E leai, o tatou lava Tulafono ia e mo le tulaga tau Tulafono o Palota e le aafia ai agavaa o sitiseni i le NPF. O lea sa maua mai le tali o le Tulafono a le NPF ia i le penisione so o se Samoa lava pe sa nofo i fafo pe i Samoa, e agavaa lava o le tagata Samoa sa nofo i fafo ae sau nofo i Samoa mo se vaitaimi e 3 masina pe sili atu ona agavaa lea i lea tulaga.

O le fesili mulimuli o le tulaga mulimuli lau Afioga, o le tele ia o le popolega o le mamalu o sui usufono i le tulaga lea o le taimi, pe lava le taimi e faatino ai lenei galuega. Sa tatou vaai foi i le Afioga i le Komesina i lona to'a i le taimi na fai ai lana folasaga. Lau Afioga i lou talitonuga e mafai i totonu o le taimi lea e faatu mai ona faatino le galuega. E le fai atu lau faamatalaga lea o se moomooga foi lea talosia ia taunuu, ae faavae lou manatu i le tulaga o lea e iai sui usufono o le Maota sa i ai i le Palota lea i le 2006. O le suiga lea i le pueina o tamamatamailima ma foliga, sa faatino i le 2005 e tolu masina na faatino ai e le Matagaluega le tulaga lea o le pue uma o ata ma tamamatamailima o le mamalu o le atunuu. O le taimi nei o la e toatele lava le aufaigaluega a le Matagaluega sa i ai i le faatinoga lea o la e i ai lava i le taimi lenei. E tolu la masina lea sa fai ai le galuega na a o le galuega lea e 18 masina lea e taatia mai e fai ai. O lou to'a lena i le tulaga e mafai ona faatino.

O atugaluga foi faapea o le fanau lea a tatou Samoa lea e faia, e maualuluga foi o latou faailoga, na omai foi le NEC fai a latou fonotaga o la foi e i ai le faatuatuaga o le NEC o tagata ia tatou lea e faia le tatou system o lo o i ai le tomai ma le agavaa e faatino ai le faamatalaga lenei.

Lau Afioga i le Fofoga Fetalai, e fia momoli le faafetai i lau Afioga i le Komesina ma le mamalu o le aufaigaluega mo galuega uma e le gata mo le

Tulafono lenei, a o isi galuega uma lava ua faatino. O lena outou faafofoga i atugaluga, o popolega o mea o lo o atugalu i ai le mamalu o sui usufono o le Maota, ia e aoga uma lava manatu e timai ma poupou ai le tatou faamoemoe ia laualuga le faatinoina o le tatou faamoemoe lea i totonu o le 18masina lea tou te fautua mai ai e mafai ona outou faia le galuega lea.

Faamalo atu i le mamalu o le Maota, e faamalo atu foi i le mamalu o Samoa o lo o faafofoga mai. Pau lava lea o le...

**Afioga Lupematasila Galumalemana Tologata Togia Tile Leia:** Lau Afioga i le Fofoga Fetalai...

**Afioga Hon Lautafi Fio Selafi Purcell (Satupaitea):** Lau Afioga i le Fofoga Fetalai, faamolemole pe maua se avanoa.

**FOFOGA FETALAI:** Ia, o lea ua faaiui mai le saunoaga a le Afioga i le Minisita o lea foi ua outou faafofoga ua ave le fautuaga i le Komesina...

**Afioga Hon Lautafi Fio Selafi Purcell:** Ioe, o le mea lena lea ou te tulai atu ai.

**FOFOGA FETALAI:** Ia se i tulai mai...

**Afioga Hon Lautafi Fio Selafi Purcell:** O lea ua faalogo atu ua faaiui le saunoaga a le Minisita, ae i ai le mataupu lea sa ou laga lava po o fea le fesoootaiga o le tatou system lea ma le tatou National ID. O lea ua ou faalogo atu... ua tele a tatou tupo ua alu i le mea lea o le National ID e 10 ma ona tupu tausaga o develop mai, a o lea la ou te fia iloa pe aoga i i i le Faiga Palota aua o le auga lena o le tatou National ID e faaaoga i le Faiga Palota. E tasi a le ID o mea uma lava lau Afioga.

O lona lua, o lea lava ou te nofo ma ou mafaufau i le expectation o le Tulafono lenei i le resitala mai lea i fafo o lea e faapea e compulsory registration tagata. O lona uiga afai la e te nofo i fafo po o fea lava e te nofo ai ua 21 ou tausaga, o oe o le sitiseni Samoa, ua e agavaa e te palota. O le expectation la o le tatou Tulafono lenei e o a'e uma lava tagata lea ua 21 tausaga la ua agavaa e palota, e o ae uma e resitala? Na ou fia malamalama i le tulaga lena aua o lea e faapea e compulsory, ae a le o ifo la e resitala e i ai le faasalaga. Na ou fia manino a i le tulaga lena leaga it's an unrealistic expectation o le Tulafono. Faamolemole lau Afioga.

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai o se mea mulimuli lava...

**FOFOGA FETALAI:** Mo le faasaoina o le taimi o lau Afioga i le Minisita, se i tulai mai le Sui Taitai o le Itu Agai...

**Tofa Hon Laufo Fonotoe Nuafesili Pierre Laufo:** O le tulaga lea sa ou laga foi lele i le itumalo lea e resitala mai ai le tagata aemaise latou mai fafo, ona o lea foi sa saunoa se tasi o sui usufono i le itumalo tonu e resitala agai ai. Aua o lea e pei e maua e i ai se isi fetuunaiga o tuaoi, a o lea foi e taoto le Lipoti foi lea a le Komiti Faa-Palemene na e i ai a latou talosaga mo le vaeluaina o le itumalo o le Afioga i le Fofoga Fatalai ma le Sui Fofoga Fatalai. A o lona uiga la o le tagata ia o itumalo ia o la e fia resitala mai ua le iloa po o fea tonu la le itumalo aua o lea e i ai fautuaga ia. Po o le mea la ua teena e le taliaina na fautuaga, e le vaeluaina itumalo ia aua e tatau ona vaelua ona iloa lea e le tagata le itumalo e resitala i ai...

**FOFOGA FATALAI:** E lelei lou fesoasoani atu i le Sui Taitai i le taua fua o tulaga ia i fautuaga a le Komiti, e leai e le i oo i le taimi e talanoaina ai. Ua uma ona fofola mai e le Kapaneta le mea lea a o lea lava e tutulai a'e ma taumafai e faaofiofi mai ua toeitiiti fai le faaiuga a le Fofoga Fatalai.

A o le vaai atu ia outou. Se i tulai mai le sui usufono o Falelatai, o le toe sui usufono lea ona saunoa lea o le Minisita e faauma ai le tatou Tulafono...

**Afioga Lupematasila Galumalemana Tologata Togia Tile Leia:** Faafetai i lau Afioga ona o lea ua faaiiu le saunoaga matagofie a le Afioga i le Minisita ae le i tali i le manatu foi o lenei itumalo sa tuuina atu. Ina ne i te i ua tupu le mea lea sa ou talanoa atu ai i le lumanae ae o lea mo faamaumauga o le Maota, ae afai lava o i ai se confidence o le Minisita e le tupu ia ae mo faamaumauga a le Maota. Ma le agaga faaaloalo.

**FOFOGA FATALAI:** Ia tulai mai lau Afioga i le Minisita. E le o toe faatagaina se isi sui usufono ae saunoa loa lau Afioga e faauma lau saunoaga. Tulai mai lau afioga e faauma lau saunoaga.

**Afioga Hon FAUALO HARRY JEFFREY SCHUSTER:** Faafetai i lau Afioga. O le tulaga lea o le compulsory ma le faasalaga i e o aumau i inei ma e o aumau i fafo lea ua tatala atu le avanoa e talosaga mai ai. E tutusa a pe nofo i Samoa pe nofo i fafo na ua avatu le avanoa, e avatu faatasi a i mea o Tulafono ia penefiti e te maua ma le faasalaga e te maua. Na o le pau la le mea lea e i ai a e nofo i fafo ae e te le talosaga mai e te oo mai loa i nei i Samoa molia loa ma oe. I le talosaga lea i le vaevaega o mea i le Palota o tatou o le Palemene o le tatou Tulafono o le Tulafono a lea taoto i le taimi nei pau a na o mea e fai iai le tatou faaiuga. O le Tulafono e 51 itumalo lea e i ai i le taimi nei o lena la lea e fai ai ae a te i ua i ai se suiga mulimuli, se ou te fai atu ia te outou e aumai le tou faatuatuaga e mafai foi e lau Matagaluega ona toe sui tuaoi ae resitala uma tagata. Aua le popole i lea tulaga.

I le tulaga lea o le ID sa saunoa ai le Afioga ia Lautafi e faapea foi le sui usufono o Falelatai ma Samatau. O le taua ia o manatu na aumai. O le taimi nei

o la e i ai le Komiti a Matagaluega uma lea e i ai faamaumauga o le Falemai, Leoleo, Immigration, Statistics ma le Palota. O le faamoemoe la e i ai pe mafai ona fai se ID foi lea e tasi e amata mai ai aua o le taimi nei i le Immigration e alu lava e tau i le pepe pe a fia alu i fafo. O le tatou National ID seiloga lava e 18 ou tausaga a o le tatou Tulafono o Palota o le 21 lea la e taumafai... E masalo la o se taimi i le lumana'i lea ua aumai le latou fautuaga o le a tasi loa le ID tatou te alu uma ai pe a tutusa uma le faiga i faamaumauga o lima e 10 ma foliga. Masalo o le a faaaoga le National ID e otomeki ona faaaoga e le Ofisa o Palota o le tulaga lena e i ai.

Lau Afioga Tologata, i lau vaai i ai e taua le fesili foi lea i le puipuiga. A o lau vaai i ai, po o le a lava le system i le lalolagi, e lelei lava system. Ae a i ai lava le tagata e kuluku e kuluku lava ia e taumafai e fai le mea sese. O le mea la lena tatou te puipui ai le Pulega ma... a vaai loa e kuluku ia ave i le falepuipui a o si ona pona la faatoa mafai ona fai i ai le mea pe a maua. A o le atugaluga la lena.

Lau Afioga o se tala mulimuli o le Tulafono ua tatou talanoa ai o se Tulafono e taua ma e maualuga i le tatou talanoaga popolega ma atugaluga. A o le talosaga i le mamalu o alii ma faipule o le galuega tatou te faia faatasi, Faalapotopotoga ma Komiti uma a afioaga ma Fono Faavae, mamalu foi i Taitai o Ekalesia i fatafitaaulaga e fia i Samoa i le latou fesoasoani.

Ae faapito lava lau faamatalaga ia oe lea e i ai le pule lea e matou te... fono ai nei le Fono Aoao a Samoa e fai le tonu, e taua i le Tulafono a e le sau e faaaoga lau aiatatau ma resitala oe ia o lona uiga, oka se matou taimi ua alu. Tele o matou mafaufauga, tele o matou popolega a o lea e te le vaai maualuga i le pule lena e te nofo ma oe. Faamolemole alu e resitala.

Lau Afioga i le Fofoga Fetalai faafetai tele lava mo le avanoa.

*Na faamaonia le lafo ma fatauina le Tulafono Tau Faaofi o Teuteuga o le Tulafono o Faiga Palota 2024 i lona fatauga faalua.*

## **TULAFONO TAU FAAOFI O TEUTEUGA O LE TULAFONO O FAIGA PALOTA 2024 – iloiloga auiliili**

**FOFOGA FETALAI:** E tusa ai ma Tulafono Tumau 104, e amata le iloiloga auiliili i le Fuaiupu 2.

**FUAIUPU 2: Ua teuteuina le fuaiupu 13.**

*Faamaonia.*

**FUAIUPU 3: Ua teuteuina le fuaiupu 23.**

*Faamaonia.*

#### **FUAIUPU 4: Aiaiga tau soloaiga.**

**Tofa Hon LAUOFO FONOTOE NUAFESILI PIERRE LAUOFO:** Lau Afioga i le Fofoga Fetalai, leai o si fesili lea ou te talitonu e taua.

**FOFOGA FETALAI:** Ia se i tulai mai lau Afioga i le sui usufono mamalu.

**Tofa Hon LAUOFO FONOTOE NUAFESILI PIERRE LAUOFO:** O le Fuaiupu 4 faamolemole, le fuaiupu mulimuli foi lea o le tatou Tulafono Tau Faaofi.

E fesili atu i le Afioga i le Minisita, o lea ou te faitau atu o lea e fai mai le Fuaiupu 4, o tagata uma lava lea i luga o le Lola Palota o lo o i ai nei, e toe apalai uma lava. E toe talosaga uma lava e toe o e resitala. E pei la e foliga mai e feteenai ma lau faamaninoga lea na aumai na ona transfer mai o i latou ia i le system fou.

Se i faamanino mai lava faamolemole.

**FOFOGA FETALAI:** Tulai mai lau Afioga i le Minisita.

**Afioga Hon FAUALO HARRY JEFFREY SCHUSTER:** Lau Afioga i le Fofoga Fetalai o le tulaga la lea sa faamanino atu, o le manaomia foi lea o le omai e pue le ata ma le... o lea la e fai atu e omai e talosaga a o lea e faasolo atu lava le Matagaluega. O le faatinoga e faatino ai, e na o le fia oo ifo lava o le tagata e faamaonia o ia lea e ona le faamaumauga lea e avatu la e moni.

O le faamalamalamaga lea o le tulaga lea lau Afioga.

**FOFOGA FETALAI:** Se i tulai mai lau Afioga i le sui usufono mamalu o Faleata.

**Tofa LEALAILYEPULE RIMONI AIAFI:** Faafetai tele lava i lau Afioga, lea na ona toe momoli atu lava aua o le mea lea na faamamafa i finagalo uma lava o sui usufono ma tatou, o le process. Le practicality o le process lea. Afai la o lea ua saunoa mai le Afioga i le Minisita, faafetai. E pei ona ou talanoa atu, a alu atu la au e resitala la ua silasila mai o au o Lealailepule ia na o le alu atu lava tuu ou tamatamailima e sefulu ma ou foliga, pau lea. Faafetai lava.

Ia faafetai lau Afioga i le Fofoga o le Fono, o le a le toe i ai se finaugia i lea itu. Faafetai.

*Faamaonia le Fuaiupu 4.*

## **FUAIUPU 1 MA LE IGOA**

### **FUAIUPU 1: Igoa puupuu ma le amataga**

**IGOA: Tulafono o Teuteuga o le Tulafono o Faiga Palota 2024**

*Faamaonia.*

*Na faagasolo le Tulafono Tau Faaofi o Teuteuga o le Tulafono o Faiga Palota 2024 e aunoa ma se Teuteuga.*

## **TULAFONO TAU FAAOFI O TEUTEUGA O LE TULAFONO O FAIGA PALOTA 2024 – faitauga faatolu**

**FOFOGA FETALAI:** Ou te tapa lau Afioga i le Minisita o le Komisi o Faiga Palota.

**Afioga Hon FAUALO HARRY JEFFREY SCHUSTER:** Faafetai lau Afioga i le Fofoga Fetalai.

Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Faiga Palota 2024 i lona faitauga faatolu.*

*Faaluaina e le Minisita mo Faatoaga ma Faiga Faiva ma le Minisita o le Soifua Maloloina.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.*

**FOFOGA FETALAI:** Ia, o lea ua taunu mai i le tatou taimi manava. Ae ao foi ona avatu se Faasilasilaga a le Fofoga Fetalai mo le faagasologa o tatou galuega. Ona a outou silasila i le tatou Pepa o Galuega o lo o i ai a tatou Lipoti e 34 e ao ona talanoaina e le Palemene.

O lea sa feiloai nei le Komisi o le Palemene, le Afioga i le Tamaitai Palemia ma le Taitai o le Itu Agai ma lenei Komisi, o lea ua i ai se fautuaga mo a outou Afioga i sui usufono mamalu o le Palemene mo le talanoaina o tatou Lipoti ia mo le vайасо fou.

UA outou silasila i ai i le tatou Pepa o Galuega, ua i ai foi le manatu e ao ona talanoa uma nei Lipoti i le vайасо fou. Ae ua i ai le fuafuaga a le Komisi e faapea, o le a le faitauina e Taitaifono taitasi a latou Lipoti e oo foi i Tali a le Malo. UA i ai le manatu maualuga o le Komisi o lena ua taatitia i luga o a outou Laulau nei Lipoti mai lela viaaso ma lenei vайасо atoa, e oo atu i lea vайасо ia ua maea ona outou faitauina uma lava tautiga o Matagaluega taitasi.

O le mea lea e i ai le agaga maualuga o le Nofoa ma le Komisi o le a faigofie foi le tatou galuega i le vайасо lea o le a sau. Ia o fuafuaga na ma ua i ai foi le faatulagaina a le Komisi i le aofai o e saunoa i ia Lipoti. Ae mo le silafia o le

avanoa lenei ia faitau lelei a outou Lipoti e tatau ona outou malamalama uma lava i tatou Lipoti uma i lea vaiaso. Ia peiseai o le Faasilasilaga lena mo le tatou galuega i le vaiaso fou ma le fuafuaga o lea ua talanoaina e le Komisi ina ia faafaigofie ai le tatou galuega mo le vaiaso fou. E i ai le manatu ua malamalama le paia o le tatou Maota e faafaigofie ai le tatou galuega mo le vaiaso a sau.

Ae i ai le talitonuga o le Nofoa ua faaaaogagase le tatou Palemene i lenei vaiaso. Ua i ai foi le manatu ua tatau ona fai se tatou malologa. Ae faafetai mo le taumafaiga o le tatou Tulafono pei ona faitau faatolu ma o lea ua pasia aloaia. Ua saausi lava saunoaga i lenei vaiaso, o itu taua uma ia mo le agai i luma o lea vaega o le auaunaga a le Ofisa o le Komesina o Faiga Palota, se i vaeatu le faatonufolau a le Pulega Faatonu. Faamalo le usufono, faamalo le onosai.

Samoa i ou tulaga faalupelupeina e momoli atu le faafetai i lau tapuaiga. Ua tau i manu le alofaiga o le Palemene i lenei vaiaso ona o le mana o lau tatalo. Pe afai ua i ai se matou gagana ua sala i lau faafofoga, ia alofa ma faamagalo. A o le matou tatalo ia tumau pea faamanuiaga a le Atua i si o tatou atunu.

E faafetai atu i le tapuaiga a Ofisa Sili o Pulega ma Matagaluega ma Faalapotopotoga Tumaoti a le tatou Malo, faafetai mo le lagolagoina o Tauualumaga a le Fono Aoao i lenei vaiaso. Ia faamanuia le Atua i lo outou valaaui.

E momoli foi le faafetai i auaunaga uma o lo o feagai pea ma auaunaga lagolago mo le saogalemu o le Fonotaga a le Palemene, Matagaluega o Fesootaiga ma Faamatatalaga Tekonolosi e ala i le 2AP, Matagaluega o Leoleo, Falepuipui ma le Ola Toefuataina e ala i le auaunaga a Malu o le Malo. O le Pulega o Auaunaga Tau Tineimu ma Faalavelave Tutupu Faafuasei - FESA ma le Kamupani a le Cool Line, faamalo faafetai tautua i le ao ma le po a o feagai le Palemene ma ana fonotaga. Faamanuia le Atua i la outou auaunaga.

Ae tatou te le i tolopo ou te talosaga atu i le sui usufono tamaitai mo Aleipata Itupa i Lalo se i saunia se tatou tatalo e faauma ai le tatou Fono.

*Na tolopo Tauualumaga a le Fono Aoao Faitulafono i le itula 12:06 i le aoauli seja aulia le Aso Lua, 12 o Mati 2024 i le itula e 9:30 i le taeao.*